

Kuwakana ya Mpa



Luzingu ya Yesu 1
Luyantiku ya Luzingu ya Yesu
(Matayo, Marko, Luka, Yoane)



Luzingu ya Yesu, Mukanda 1

Luyantiku ya Luzingu ya Yesu

(Mikanda ya Matayo, Marko, Luka, ti Yoane)

Beleso 16 sambu na bana ti bajeune



Une réalisation du Projet Mwinda, Ministères pour Chaque Enfant

Musoniki : Mama Lorella Rouster

Edition 2024 Credit Photo : freebibleimages.org/Sweetpublishing Merci !

LUZINGU YA YESU I Baleso 16 MAMBU KELE NA MUKANDA YAI :

Baleso yai yantika na Mwana-Nzambi ya ke zinga mvu ya mvu. Yo luta na ntangu wanzio songa nde Yoane Baptiste ta butuka sambu na kuyidikila Yandi nzila. Yo suka na mpukumunu ya Yesu na ntuala ya luyantiku ya malongi na Yandi.

1. Luzingu ya Yesu yantikaka nki ntangu ?	Dititi
Yesu kele Nzambi kibeni. Yandi me zinga mvu ya mvu. Tata Nzambi gangaka bima yonso na kimvuka ti Yandi. Yoane 1 : 1-3, 11-14, 18	4
2. Wanzio Gabriele songaka bansangu zole ya yituka.	
Wanzio songaka Zakaria nde yandi ta buta Yoane Baptiste sambu na kuyidikila Mesia nzila, ti wanzio songaka Maria nde Yandi ta buta Mesia. Luka 1 :8-33.....	8
3. Bantu tatu kukumisa Mesia, bu Yandi kele kaka na divumu ya Maria.	
Maria ti Elisabeti yangalalaka, mwana Yoane pumbukaka na kiese na divumu ya mama. Luka 1 :39-56.....	13
4. Yoane kwisaka sambu na kuyidikila Yesu nzila.	
Yoane butukaka, ti Papa Zakaria kumisaka Nzambi. Luka 1 : 57-80	17
5. Wanzio songaka Yozefi nde Maria ta buta Yesu Mesia.	Matayo 1 :18-2521
6. Lubutuku ya Yesu	
Yozefi ti Maria kwendaka na Betlehemi sambu na kusonika bazina na bo na mambu ya mpaku ya Roma. Kuna, bo monaka ve sika ya nkaka kupema, yo yina, Yesu butukaka na nzo ya bambisi. Luka 2:1-7	25
7. Bamvungi monaka Mwana Yesu	
Wanzio songaka bamvungi nde Mesia me butuka. Yo yina, bo kwisaka kumona Yandi. Luka 2 :8-20	29
8. Bibuti nataka Bebe Yesu na Nzo-Nzambi ti songaka bantu ya nkaka.	
Baprofete Simeoni ti Anna kumisaka Nzambi sambu Mesia me kwisa. Luka 2 :21-38	33
9. Bandwenga ya Este kwisaka kusamba Mwana Yesu.	
Mbwetete monikaka na bandwenga. Bo landaka yo, ebuna bo sambilaka Mwana Yesu ti pesaka Yandi makabu. Matayo 2 :1-12	37
10. Nzambi bumbaka Mwana na Yandi.	
Nzambi bumbaka Yesu na Ezipte sambu Erode na kimpala zolaka kufwa Yandi. Matayo 2 :13-22	41
11. Yezu na fami vutukaka na Nazareti, ti Yandi kulaka kuna ti kumaka ngolo na Ndinga ya Nzambi.	
Ntangu Yandi lungisaka bamvula 12, Yandi vandaka na Nzo-Nzambi kulonga banlongi ya Ndinga ya Nzambi. Matayo 2 :19-23, Luka 2 :39-52 Matayo 13 :55-56	45
12. Yoane yantikaka kulonga sambu na kuyidikila Yesu nzila.	
Yoane yantikaka kubinga bantu kubalula ntima, mpi kubotika bo ya ndimaka. Matayo 3 :1-6, Marko 1 : 2-6, Luka 3 :1-6, Yoane 1 :19-23	50
13. Yoane songaka bantu nki mutindu kubalula ntima.	
Yandi pesaka bambandu na bantu bonso basoda, etc. Matayo 3 :1-6, Luka 3 :7-14	54

14. Yoane songaka Yesu bonso Mesia ti Mwana-Dimeme ya Nzambi.

Yoane songaka nde Yesu muntu ta katula bantu na masumu na bo na menga na Yandi.

Luka 3 :15-18, Yoane 1 :29-30a58

15. Yoane botikaka Yesu. Matayo 3 :13-17, Marko 1 :9-11, Luka 3 :21-23a62**16. Yesu nungaka mpukumunu ya ngolo. Yandi vutulaka Satana kaka Ndinga ya Nzambi.**

Matayo 4 :1-11, Marko 1 :12-13, Luka 4:1-1366

Bangindu Nki Mutindu Kulonga Mikanda ya Bible71

Bankunga ya beto sadila na mukanda yai72-74

Linya ya Ntangu75-76

NB : Na baleso yai, beto me sadila Bible, Version Mwindi, traduit par l'ONG 'Ministères pour Chaque Enfant, RDC'.

Matondo na sambu na baphoto na www.freebibleimages.org/ Sweet Publishing, /Lumo Project, /Good News Productions Int.

Leso 1. Luzingu ya Yesu yantikaka nki ntangu ?

Yoane 1 : 1-3, 11-14, 18, Kuyantika 1 :26a

Leso Yai na Nkufi: Yesu kele Nzambi kibeni. Yandi me zinga mvu ya mvu. Tata Nzambi gangaka bima yonso na kimvuka ti Yandi.

I. Preparatio ya moniteur--

🕒 Kikuma ya Leso :

Beto ta samba Yesu na ntima na beto yonso, sambu beto bakisa nde Yandi kele Nzambi kibeni yina gangaka bima yonso. Yandi me kulumuka kukuma Mvulusi na beto.

♥ Verse ya Kulonguka :

[**Moniteur, NB:** Na baleso yai yonso, parti ya verse ya beno lenda sadila na bana prescolaire, beto me soulinye yo. Beto me sadila kidimbu / kusonga nki mutindu kukabisa bafraze ya verse ntangu nge ke longa yo.]

Na luyantiku ya bima yonso,/ Ndinga vandaka dezia./ Ndinga vandaka sikamosi ti Nzambi,/ ti Ndinga vandaka Nzambi kibeni./ Yoane 1 :1

🗨️ Bankunga ya kwenda nzila mosi ti lesu :

Mazono, Bubu, Mvu ya Mvu
Mosi na Tatu

II. REVISIO

↑ Kuyindula diaka baleso me luta :

Leso yai ke yantika ndambu ya Bible ya bo sonikaka na nima Yesu kwisaka. Beto binga yo 'Kuwakana ya Mpa'. Yo landa parti ya mwa-nda ya Bible ya bo sonikaka na ntswala ya Yesu. Beto binga parti yina 'Kuwakana ya Ntama'. Na Kuwakana ya Ntama, bo sonikaka mpila Nzambi salaka bibuti na beto mbote na kifwani ya Nzambi. Bo sonikaka mpila bo pesaka Nzambi mukongo. Bo buyaka nzila na Yandi. Kuwakana ya Ntama songaka beto mpi mpila Nzambi silaka nde Yandi ta tinda Mvulusi.

III. KULONGA LESO YAI

➔ Kuyantika Leso :

Konso mvula, na ntangu ya Noel, mabundu mingi sala theatre kusonga lubutuku ya Yesu. Mbala mingi, beto yindula nde lubutuku kele luyantiku ya

luzingu ya muntu, ata beto zaba nde dezia bebe me zinga bangonda uvwa na divumu ya mama. Kansi kana beto yindula Yesu, luyantiku ya luzingu na Yandi vandaka mutindu ya nkaka mpenza. Yandi vandaka na luyantiku ve ! Nki mutindu ?

🏠 Malongi ya nene ya lesu yai (Developpement) na banti ya malongi 4 :

1.1 Na luyantiku ya bima yonso, Mwana-Nzambi vandaka dezia kuzinga. Yoane bingaka Yandi 'Ndinga.'

📖 Tangila bana baverse yai :

Yoane 1 :1a Na luyantiku ya bima yonso, Ndinga vandaka dezia.

? Yula bana

✍️ Bana sala bageste to mwa-senete

🗨️ Bana yimba ti kina

1.2 Mwana-Nzambi vandaka me zinga mvu ya mvu na kintwadi ti Tata Nzambi.

📖 Tangila bana baverse yai :

Yoane 1 :1b Ndinga vandaka sikamosi ti Nzambi, ti Ndinga vandaka Nzambi kibeni.

2 Ee, Yandi vandaka kuzinga ti Nzambi na luyantiku.

1 :15 NB : Yoane-Baptiste vandaka bangonda sambanu mbuta ya Yesu. (Bo vandaka bacousin.) Kansi Yoane tubaka nde Yesu zingaka na ntswala na yandi.)

Ndinga vandaka sikamosi ti Nzambi, ti Ndinga vandaka Nzambi kibeni.

2 Ee, Yandi vandaka kuzinga ti Nzambi na luyantiku.

? Yula bana

✍️ Bana sala bageste to mwa-senete

🗨️ Bana yimba ti kina

1.3 Tata Nzambi gangaka bima yonso na kimvuka ti Mwana Nzambi.

📖 Tangila bana baverse yai :

Yoane 1 :3 Nzambi salaka bima yonso na kimvuka na Yandi, ti kukonda Yandi, Yandi salaka ata kima mosi ve.

*Kuyantika 1 :26a Ebuna Nzambi tubaka nde :
"Ntangu yai, beto sala bantu..."*

NB : Ata na luyantiku, ntangu Yandi salaka bima yonso ti bantu ya ntete, Yandi vandaka mosi, kansi Yandi tubaka na pluriel.

? Yula bana

 **Bana sala bageste to mwa-senete**

 **Bana yimba ti kina**

1.4. Mwana-Nzambi kitukaka muntu sambu na kusonga beto Nzambi. Wanzio songaka bo kupesa Yandi zina Yesu.

 **Tangila bana baverse yai :**

Yoane 1 :14 Ebuna Ndinga kitukaka Muntu. Yandi zingaka na kati na beto, ti beto monaka lukumu na Yandi, lukumu ya Mwana-Nzambi me baka na Tata na Yandi. Yandi vandaka ya kifuluka na nlemvo ti na masonga.

18 Ata muntu mosi me mona Nzambi ve. Kansi Mwana-Nzambi, ya kele na diboko ya kibakala ya Tata, Yandi me songa beto Nzambi.

? Yula bana

 **Bana sala bageste to mwa-senete**

 **Bana yimba ti kina**

>|< **Kumanisa Malongi :**

Yesu butukaka na Mama Maria, kansi yina vandaka luyantiku na Yandi ve. Yandi kele Nzambi kibeni. Yandi me zinga mvu ya mvu na kintwadi ti Tata na Yandi. Tata Nzambi gangaka bima yonso na kimvuka ti Yandi. Yandi bikisaka kiti ya kimfumu na Yandi na zulu, Yandi kulumukaka sambu na kusonga beto Nzambi, mpi sambu na kukuma Mvulusi na beto. O, luzolo ya nene na Yandi ! O, nki mutindu beto fweti samba Yandi ti vutula Yandi matondo !

 **Devoir sambu na bakristo :**


Konso lumbu, tula kuluta ngolo na kusamba Yesu Kristo ti kuvutula Yandi matondo na yonso Yandi me sala sambu na beto.

 **Verse ya Kulonguka :**

Na luyantiku ya bima yonso,/ Ndinga vandaka dezia./ Ndinga vandaka sikamosi ti Nzambi,/ ti Ndinga vandaka Nzambi kibeni./ Yoane 1 :1

 **Bankunga ya kwenda nzila mosi ti leso :**

Mazono, Bubu, Mvu ya Mvu
Mosi na Tatu

 **Invitation sambu na bo ya me yamba Yesu ntete ve :**

Kana nge me yindula nde Yesu kele kaka longi ya nene, kaka nduku, kaka profete, yindula diaka. Yindula mbote nki Bible ke tuba sambu na Yandi.

Yandi kele kieleka Nzambi, me kulumuka sambu na kugulusa beto. Bubuyai, Yandi ke yamba bantu yonso yina balula ntima kukwisa na Yandi na lukwikilu. Lumbu mosi, Yandi ta vanda Zuzi. Na lumbu yina, Yandi ta yamba bantu kana Yandi mona zina na bo kele kusonika na Mukanda ya Moyo na Yandi. Kaka bo. Na lumbu yina ya zuzema, Bible ke tuba nde « Kana bo monaka ve zina ya muntu na Mukanda ya Moyo, bo losaka yandi na zanga ya tiya » (Kusonga 20 :15).

Mbote nge kwisa na Yesu bubuyai. Yandi ta vanda zuze ve, kansi Yandi ta vanda Mvulusi na nge. Kaka Yandi lenda vutula nge na kinduku ti Nzambi.

Konso mposo, beto kele awa na nima ya ecodim sambu na kusadisa bayina me zenga nde bo zola bika nzila na bo mosi, bo zola landa Yesu Kristo.

NSUKA YA LESO 1

 **Kana ntangu ikele--Kulonga mikanda ya Bible :**

Tala bangindu na nsuka ya mukanda yai.



Leso 1

Yesu Kristo kotaka nsi-ntoto bonso bebe, kansi lubutuku vandaka ve luyantiku ya moyo na Yandi. Ntangu mama na Yandi bakaka divumu vandaka luyantiku ya moyo na Yandi ve. Yandi vandaka me zinga mvu ya mvu na kimvuka ti Tata na Yandi, Nzambi. Yandi kele Mwana-Nzambi ti Nzambi kibeni.

Leso 1

**Na
luyantiku
ya bima
yonso,**



**Ndinga vandaka dezia.
Ndinga vandaka
sikamosi ti Nzambi,
ti Ndinga vandaka
Nzambi kibeneni.**

Yoane 1 :1

Leso 2. Wanzio Gabriele songaka bansangu zole ya yituka.

Leso yai na nkufi : Wanzio songaka Zakaria nde yandi ta buta Yoane Baptiste sambu na kuyidika nzila sambu na Mesia, ebuna wanzio songaka Maria nde Yandi ta buta Mesia.

Luka 1 :8-33

I. Preparatio ya moniteur

🎯 Kikuma ya lesu yai :

Beto ndima na kiese nde Nzambi me tindila beto Mesia Yesu Kristo.

♥ Verse ya kulunguka :

Wanzio vutulaka Maria nde :/ "Mpeve ya Nzambi ta kulumuka /na zulu na nge./ Ngolo ya Nzambi-Mpungu/ ta fika nge./ Yo yina, Mwana ya Santu yina ta butuka, / bo ta binqa Yandi Mwana-Nzambi."/ Luka 1 :35

👂 Bankunga ya kwenda nzila mosi ti lesu yai :

Mwana Nzambi Mene Kuma Awa (traditionel) Yangalala, Bantu Yonso !

II. Revisio

⬆ Kubambuka lesu ya mposu me luta :

Bana, na mposu me luta, beto me longuka nde Yesu vandaka wapi na ntwala ya lubutuku na Yandi ? (Sikamosi ti Tata Nzambi na zulu.)

Nki ntangu Yesu yantikaka ?

(Yandi vandaka ve na luyantiku, kansi Yandi zingaka mvu ya mvu, sambu Yandi kele Nzambi kibeni.)

III. Kulonga lesu yai

➔ Kuyantika lesu :

Bana, kana mama na nge mona nde yandi kele na divumu ya mpa, yandi songa bantu nki mutindu ? [Moniteur, bana lenda pesa mvutu ya nkufi.]

Bubuyai ti na ndambu bamposu, beto ta mona mpila Nzambi yidikaka nzila sambu na kukwisa ya Mesia, ti mpila Yandi songaka bantu mambu ya Yandi zolaka kusala. Kansi beto fweti bakisa nde lubutuku vandaka luyantiku ya Yesu ve. Ata

bangonda uvwa na ntwala na yo, ntangu Mpeve ya Nzambi tulaka bebe ya fioti na divumu ya Maria, yina vandaka luyantiku na Yandi ve.

Sambu na nki ? Sambu Yesu vandaka Mwana ya Nzambi. Keti Nzambi kele na luyantiku ? Ikele ve. Beto tuba nki ? Nzambi MVU YA MVU. Kukonda luyantika, mvu ya mvu, Mwana-Nzambi vandaka kuzinga na kintwadi ya kitoko ti Tata na Yandi, ti Mpeve ya Longo. Awa beto ke mona ve luyantiku ya Yesu, kansi beto ke mona lukanu ya Nzambi kutindila Mwana na Yandi na nsi-ntoto yai, Yandi kituka muntu bonso beto, sambu Yandi gulusa beto na masumu.

🏠 **Developpement (Banti ya malongi ya lesu yai na bandambu 4) :**

2.1 Wanzio Gabriele songaka Zakaria nde nkento na yandi Elisabeti ta buta mwana yina ta yidika nzila sambu na Mesia. Luka 1 :8-17

📖 Tangila bana :

8 Ebuna, kilumbu mosi, bu Zakaria vandaka kusala kisalu ya kinganga-Nzambi...

10 Bantu yonso yina vandaka kusamba Nzambi, bo vandaka kusamba na nganda ya Nzo-Nzambi, ntangu Zakaria vandaka kuyoka bima ya mananasi.

11 Ebuna wanzio ya Mfumu Nzambi kwisaka kumonika na Zakaria...

12 Ntangu Zakaria monaka yandi, yandi monaka mpasi, ti boma simbaka yandi.

13 Kansi wanzio tubilaka yandi nde : "Kuwa boma ve, Zakaria, sambu Nzambi me wa lombilu na nge. Nkento na nge Elisabeti ta butila nge mwana ya bakala, ti nge ta pesa yandi zina : Yoane.

15 ...yandi ta vanda muntu ya nene na meso ya Mfumu Nzambi... Yandi ta vanda ya kifuluka na Mpeve na Nzambi, ata na ntangu yandi kele kaka na divumu ya mama.

16 Ebuna yandi ta vutula bantu mingi ya Israele na Mfumu Nzambi na bo.

? Yula bana :



Bana sala bageste :



Bana yimba ti kina :

2.2 Nzambi kumisaka Zakaria baba, sambu yandi kwikilaka nswalu ve ndinga ya Nzambi, kansi yonso salamaka kaka na mpila ya Gabriele me tuba. Luka 1 :18-25



Tangila bana :

18 Ebuna Zakaria yulaka wanzio : « Nki mutindu mono ta zaba nde mambu yai ta salama ? Sambu mono kele mununu, ti nkento na mono mpi me nuna. »

19 Wanzio vutulaka nde : “Mono kele Gabriele, wanzio ya ke telamaka na meso ya Nzambi. Nzambi me tinda mono na nge sambu na ...kumatila nge nsangu yai ya mbote.

20 Kansi, atasio. Nge ta kuma baba. Nge ta mona ve mpila ya kutuba tii na lumbu ya mambu yai ta salama, sambu nge kwikilala ve bandinga na mono. Kansi bandinga yina, Nzambi ta sala yo na ntangu ya Yandi me tulaka. »

21 Ntangu yai, bantu vandaka kuingila Zakaria. Bo vandaka kuyituka, sambu yandi me sala ntangu mingi na kati ya Nzo-Nzambi.

22 Kansi ntangu yandi basikaka, yandi monaka mpila ya kutuba ve, ebuna bo bakisaka nde yandi me mona mbona-meso na kati ya Nzo-Nzambi...

23-24 ...Yandi vutukaka na nzo na yandi. Na nima, nkento na yandi Elisabeti kwisaka kubaka divumu...

? Yula bana :



Bana sala bageste :



Bana yimba ti kina :

2.3 Wanzio Gabriele songaka Maria nde yandi ta buta Mesia, ti mpangi na yandi Elisabeti me baka divumu mpi. Luka 1 :26-33



Tangila bana :

26-27 Ntangu Elisabeti vandaka na divumu ya bangonda sambanu, Nzambi tindaka wanzio Gabriele na bwala ...Nazareti...na mwana-nkento mosi ya me zaba bakala ntete ve. Zina na yandi Maria. Yandi vandaka na dilaka ya makwela na Yozefi...

28 ...Wanzio ...tubilaka Maria nde : “Yangalala ! Mfumu Nzambi me tala nge na disu ya mbote.” Yandi kele ti nge. Nzambi me sakumuna nge na kati ya bankento yonso. »

29 Ntangu Maria monaka yandi, yandi monaka mpasi sambu na mambu ya yandi tubaka. Yandi vandaka kudyula : ‘Nki disongidila ya mbote yina ?’

30 Ebuna wanzio tubilaka yandi nde: “Maria, kumona boma ve...

31 Nge ta baka divumu. Nge ta buta Mwana ya bakala. Nge ta pesa yandi zina : Yesu.

32-33 Yandi ta vanda Muntu ya nene. Bo ta binga Yandi Mwana ya Nzambi-Mpungu ...Kimfumu na Yandi ta suka ve. »

? Yula bana :



Bana sala bageste :



Bana yimba ti kina :

2.4 Maria bakisaka ve, kansi yandi ndimaka bonso sielo ya Nzambi. Luka 1 :34-38



Tangila bana :

34 Ebuna Maria yulaka wanzio : « Nki mutindu mambu yai lenda vanda ? Sambu mono me zaba bakala ntete ve. »

35 Wanzio vutulaka Maria nde : « Mpeve ya Nzambi ta kulumuka na zulu na nge ti ngolo ya Nzambi-Mpungu ta fika nge. Yo yina, Mwana ya Santu yina ta butuka, bo ta binga Yandi Mwana-Nzambi.

36 Tala, mpangi na nge Elisabeti, yandi mpi me baka divumu ya mwana-bakala, ata yandi kele

mununu. Yai ngonda ya sambanu sambu na yandi ya vandaka mukobo.

37 Sambu Nzambi lunga sala mambu yonso. »

38 Ebuna Maria nde : « Tala mono, sielo ya Mfumu Nzambi. Bika mambu yina kusalama na mono mutindu nge me tuba. » Ebuna, wanzio bikisaka, yandi kwendaka ka yandi.

? Yula bana :



Bana sala bageste :



Bana yimba ti kina :

>|< Kumanisa lesu:

Lubutuku ya Yesu Kristo vandaka mambu ya nene. Yo yina, Nzambi yidikaka Yoane kubinga bantu kuyidika ntima na bo sambu na kuyamba Yandi. Gabriele vandaka wanzio na zulu-zulu. Nzambi tindaka yandi na Elisabeti ti na Maria sambu na kusaonga bo mambu ya Nzambi vandaka kusala.



Devoir sambu na bakristo :

Kana nge kele mukristo, devoir beto ke pesa nge, yo yai: kusamba mingi na mposo yai, kuyangalala ti kutonda Nzambi sambu Yandi tindaka Mwana na Yandi na ntoto yai kugulusa beto.

♥ Verse ya kulonguka :

Wanzio vutulaka Maria nde :/ “Mpeve ya Nzambi ta kulumuka /na zulu na nge./ Ngolo ya Nzambi-Mpungu/ ta fika nge./ Yo yina, Mwana ya Santu yina ta butuka,/ bo ta binga Yandi Mwana-Nzambi.”/ Luka 1 :35

Bana tuba verse ndambu-ndambu na nima ya nge, mbala sambanu ti bageste.

🗣️ Bana yimba :

Twadisa bana kuyimba bankunga ya ke kwenda nzila mosi ti lesu yai.



Kubinga bana na Yesu :

Kana nge me yamba Yesu ntete ve na luzingu na nge, zaba nde Yandi kwisaka kulumuka na ntoto yai sambu na kukuma Ngulusi na nge. Yandi zingaka

luzingu mosi ya kitoko kukonda masumu. Na nsuka, Yandi pesaka moyo ti menga na Yandi bonso nkailu kufuta mfuka ya masumu na nge ti ya mono. Yandi fwaka, kansi na nima ya bilumbu tatu, Yandi telamaka diaka. Yandi manisaka kisalu na Yandi, ebuna Yandi vutukaka na zulu. Bubuyai Yandi kele na moyo. Yandi ta wa nge kana nge binga zina na Yandi. O, kana nge me yamba Yandi ntete ve, lomba Yandi kugulusa nge bubuyai. Yandi me sila kuyamba nge.

==NSUKA YA LESO 2



Kana ntangu ikele--Kulonga mikanda ya Bible :

Tala bangindu na nsuka ya mukanda yai.

Leso 2



Wanzio Gabriele monikaka ntete na Zakaria ntangu yandi vandaka kusala kisalu ya kinganga na Nzo-Nzambi. Yandi songaka nde yandi ti nkento na yandi Elisabeti ta buta muntu ya ta yidika ntima ya bantu sambu na kukwisa ya Mesia.

Na nima, wanzio yina monikaka na Maria. Yandi songaka Maria nde ata yandi me zaba bakala ntete ve, Nzambi ta pesa yandi Mwana. Mwana yina ta vanda Mesia-Mvulusi. Bo ta pesa Yandi zina 'Yesu'.

Leso 2

**Wanzio vutulaka Maria
nde :**

**“Mpeve ya Nzambi ta
kulumuka na zulu na nge.
Ngolo ya Nzambi-Mpungu
ta fika nge.**

**Yo yina, Mwana ya Santu
yina ta butuka,
bo ta binga Yandi
Mwana-Nzambi.”**

Luka 1 :35

Leso 3. Bantu kumisaka Mesia, bu Yandi vandaka kaka na divumu ya Maria.

Leso yai na nkufi : Maria ti Elisabeti yangalalaka, ti mwana Yoane pumbukaka na kiese na divumu ya Elisabeti sambu na kukwisa ya Mesia.

Luka 1 :39-66

I. Preparatio ya moniteur

🕒 Kikuma ya lesu yai :

Beto kumisa Yesu ya kuluta, sambu Yandi keke ya kulunga nde beto kumisa Yandi.

♥ Verse ya kulunguka :

Beto kumisa nlemvo ya kitoko ya Nzambi/ sambu na nlemvo na Yandi./ Yandi kumisaka beto/ bantu ya Nzambi lenda ndima./ bantu ya Mwana ya luzolo na Yandi. Efezo 1 :6

🗣️ Bankunga ya kwenda nzila mosi ti lesu yai :

Kumisa Zina ya Yesu
Yangalala, Bantu Yonso
Mwana Yina Nani ?

II. Revisio

📖 Kubambuka lesu ya mposu me luta :

[Moniteur, nge tanga revisio, ebuna na bisika ya ligne ____, nge kinga fioti, ti bana songa nki ndinga fweti landa.]

Na mposu me luta, beto monaka nde Nzambi tindaka wanzio zina ya _____(Gabriele) na bantu zole.

Ntete yandi kwendaka na _____ (Zakaria). Zakaria monaka yandi na kati ya _____ (Nzo-Nzambi).

Wanzio songaka Zakaria nde nkento na yandi Elisabeti ta buta _____ (mwana ya bakala) ti bo ta pesa yandi zina _____ (Yoane). Kisalu na yandi ta vanda ku _____ (yidika nzila sambu na Mesia).

Na nima, wanzio Gabriele kwendaka na bwala ya Nazareti kumonika na mwana-nkento zina ya _____(Maria). Yandi songaka Maria nde Nzambi me sola yandi kubuta _____

(Mesia to Mwana na Yandi).

Bo ta pesa yandi zina : _____(Yesu).

III. Kulonga lesu yai

➔ Kuyantika lesu :

Na lesu yai, beto ta mona mambu ya yituka ya salamaka ntangu Maria kwendaka kutala mpangi na yandi Elisabeti.

🏠 **Developpement (Banti ya malongi ya lesu yai na bandambu 3) :**

3.1 Maria kwendaka kutala mpangi na yandi Elisabeti na nzo na yandi. Luka 1 :39-40

📖 Tangila bana :

39 Na bilumbu yo yina kaka, Maria simbaka nzila. Yandi kwendaka nswalu na bwala mosi na bangumba ya Yudea.

40 Yandi kotaka na nzo ya Zakaria, ebuna yandi pesaka Elisabeti mbote.

? Yula bana :

👤 Bana sala bageste :

👣 Bana yimba ti kina :

3.2 Elisabeti ti mwana Yoane na divumu na yandi, bo zabaka mbala mosi nde divumu ya Maria vandaka Mesia ti Mfumu. Luka 1 :41-45

📖 Tangila bana :

41 Ebuna mambu bwaka mutindu yai : Ntangu Elisabeti waka mbote ya Maria, mwana nikanaka na divumu ya Elisabeti. Ebuna Elisabeti fulukaka na Mpeve ya Nzambi,

42 ti yandi tubaka na ndinga ya ngolo nde : « Nzambi me sakumuna nge kuluta bankento yonso ya nkaka ! Yandi me sakumuna mpi Mwana ya keke na divumu na nge !

43 Mono nani, nde mama ya Mfumu na mono me kwisa kutala mono ?

44 Sambu kieleka, ntangu mono me wa mbote ya nge me pesa mono, mwana me nikana na kiese na divumu na mono.

45 Nge ke na kiese, sambu nge kwikilaka nde mambu ya wanzio tubilaka nge na zina ya Mfumu Nzambi, yo ta salama kaka mpidina !”

? Yula bana :



Bana sala bageste :



Bana yimba ti kina :

3.3 Maria kumisaka Nzambi sambu na mpila Yandi vandaka kusala ti yandi. Ebuna, na nima ya bangonda tatu, yandi vutukaka na nzo na yandi.

Luka 1 :46-56



Tangila bana :

46 Ebuna Maria tubaka nde : « Mono ke kumisa Mfumu Nzambi na ntima na mono.

47 Mono ke yangalala na Nzambi, Ngulusi na mono,

48 Sambu Yandi me tala mono bonso nsadi na Yandi, ata mono kele mfunu mingi ve...

49 Sambu Nzambi-Mpungu me sala mambu ya nene sambu na mono. Zina na Yandi kele ya Santu mpenza.

50 Bantu yina ke zitisaka Yandi, Yandi ke wilaka bo mawa mvula na mvula.

56 Ebuna Maria bikalaka ti Elisabeti kiteso ya bangonda tatu. Na nima, yandi vutukaka na nzo na yandi.

? Yula bana :



Bana sala bageste :



Bana yimba ti kina :

>|< Kumanisa lesu :

Beto me mona nde bantu tatu bakisaka ata na luyantiku nde Mwana na divumu ya Maria vandaka Mesia, Mfumu. Bo yai : Elisabeti, mwana na yandi na divumu, ti Maria, mama ya Yesu. Yo yina, bo kumisaka Yandi. Mwana-Nzambi bikisaka zulu ti kotaka na divumu ya Maria bonso mwana ya fioti. Yo yina, Mvulusi na beto kele lunga kubaka lukumu.



Devoir sambu na bakristo :

Beno bakristo, devoir mono ke pesa beno bubuyai kele nde beno kumisa Yesu mpi. Konso mbala ya nge yindula Yandi, kumisa Yandi, sambu Yandi kele ya kulunga.



Verse ya kulunguka:

Bana tuba yo mbala sambanu ti bageste.

Beto kumisa nlemvo ya kitoko ya Nzambi/ sambu na nlemvo na Yandi./ Yandi kumisaka beto/ bantu ya Nzambi lenda ndima,/ bantu ya Mwana ya luzolo na Yandi. Efezo 1 :6



Bana yimba nkunga :

Bana yimba mosi ya bankunga ya kwenda nzila mosi ti lesu yai.



Kubinga bana na Yesu :

Kana nge me yamba Yesu ntete ve bonso Mvulusi na nge, beto lenda sadisa nge na yo bubu yai. Kaka bikala ti songa beto na nima ya ecodim, “Mono zola yamba Yesu.”

==NSUKA YA LESO 3



Kana ntangu ikele--Kulonga mikanda ya Bible : Tala bangindu na nsuka ya mukanda yai.

Leso 3



Ntangu Elisabeti yambaka Maria, mwana Yoane Baptiste vandaka kunikana na kiese na divumu na yandi.

Bo yonso tatu bakisaka nde mwana na divumu ya Maria vandaka Mesia-Mvulusi. Yo yina, bo kumisaka Yandi.

Leso 3

**Beto kumisa nlemvo ya
kitoko ya Nzambi
sambu na nlemvo na
Yandi.**

**Yandi kumisaka beto
bantu ya Nzambi lenda
ndima,
bantu ya Mwana ya
luzolo na Yandi.**

Efezo 1 :6

Leso 4. Yoane kwisaka kuyidikila Yesu nzila.

Leso yai na nkufi : Yoane butukaka, ti Papa Zakaria kumisaka Nzambi sambu yandi bakisaka nde mwana yina ta yidika nzila sambu na kukwisa ya Mesia, Yesu.

Luka 1 : 57-79

I. Preparatio ya moniteur

🕒 Kikuma ya lesu yai :

Beto yamba Yesu na kiese, ti beto sala ngolo sambu bantu ya nkaka mona mpila kuyamba Yandi mpi.

♥ Verse ya kulunguka:

(Papa Zakaria ke tuba sambu na mwana na yandi Yoane) Ti nge mwana na mono, bo ta binga nge profete ya Nzambi-Mpungu, sambu nge ta kwenda na ntwala ya Mfumu, sambu na kuyidikila Yandi banzila. Luka 1 :76

🗣️ Bankunga ya kwenda nzila mosi ti lesu yai :

Mbote Bo Yonso Zaba
Yangalala, Bantu Yonso !
Mwana Yina Nani ?

II. Revisio

↑ Kubambuka lesu ya mposu me luta :

Beto me mona nde wanzio Gabriele me songa bantu zole nde bo ta buta. Bo nani ?
(Zakaria ti nkento na yandi Elisabeti, bo ta buta Yoane ata bo me nuna. Ti Maria, yina me buta Mesia, ata yandi me zaba bakala ntete ve, yandi ta buta Yesu Mesia.)

Beto me mona nde mwana ya Elisabeti na divumu vandaka na kiese ntangu Maria kotaka nzo na bo ti mwana Yesu na divumu na yandi. Nki yandi salaka ? (Yandi vandaka kunikana na kiese na kati ya divumu.)

III. Kulonga lesu yai

➔ Kuyantika lesu :

Mbala mingi, kana mfumu ya nene to president ya nsi ke zola kuvisiter sika ya nkaka, yandi ta tinda bantu na ntwala na yandi. Bo ta yidika mambu yonso sambu na kukwisa ya mfumu yina. Bo ta yidika mambu sambu bantu yamba yandi na mpila ya kulunga nene na yandi.

Ntangu Nzambi zolaka kutindila beto Mwana na Yandi, Yandi yidikaka muntu speciale sambu yandi yidika nzila. Muntu yina vandaka Yoane. Bubu yai beto ke landa kumona lubutuku na yandi.

🏠 Developpement (Banti ya malongi ya lesu yai na bandambu 3) :

4.1 Bantu yonso bakisaka nde Yoane ta vanda muntu ya nene sambu na mpila yandi butukaka. Luka 1 :57-66

📖 Tangila bana :

57 Ebuna, ntangu sambu na Elisabeti ya kubuta lungaka, ti yandi butaka mwana ya bakala.

59-60 Ebuna, Ntangu mwana lungisaka bilumbu nana, bo kwisaka sambu na kuzengisa yandi. Bo yindulaka kupesa yandi zina ya tata na yandi Zakaria, kansi mama na yandi vutulaka nde : « Ve, zina na yandi ta vanda Yoane. »

62 Ntangu yai, bo yulaka tata na yandi na bidimbu sambu na kuzaba kana nki zina yandi zolaka kupesa mwana na yandi.

63 Zakaria lombaka kima ya kusonika, ebuna yandi sonikaka nde : « Zina na yandi Yoane. » Yo yina, bo yonso yitukaka.

66 Ti bantu yonso yina waka mambu yina, bo vandaka ...kudiyula nde : « Mwana yai vanda nani ? » Ti diboko ya Nzambi vandaka na mwana Yoane.

? Yula bana :

👤 Bana sala bageste :

👣 Bana yimba ti kina :

4.2 Zakaria kumisaka Nzambi mingi sambu yandi bakisaka nde mwana na yandi Yoane ta yidika nzila sambu na Mesia.

Luka 1 :67-79

Tangila bana :

67 Ntangu yai, tata na yandi Zakaria fulukaka na Mpeve ya Nzambi, ti yandi yantikaka kutuba nde :

68 « Lukumu kuvanda na Mfumu Nzambi ya Israele...

69-70 Yandi me basisila beto Ngulusi ya ngolo na dikanda ya Davidi nsadi na Yandi, mutindu Yandi tubaka na munoko ya bapofete ya santu na Yandi :

76 Ti nge mwana na mono, bo ta binga nge profete ya Nzambi-Mpungu, Sambu nge ta kwenda na ntwala ya Mfumu, sambu na kuyidikila Yandi banzila.

77-78 Sambu na kusonga bantu na Yandi mpila bo lenda guluka, mpila Nzambi lenda lolula masumu na bo, na nlemvo ya nene ya Nzambi na beto.

? Yula bana :

 Bana sala bageste :

 Bana yimba ti kina :

4.3 Nzambi lundaka Yoane na nseke tii ntangu lungaka na yandi kulonga ti kusonga Mesia.

Luka 1 :80

Tangila bana :

80 Ebuna mwana Yoane vandaka kukula, ti yandi kumaka ngolo na kimpeve. Yandi vandaka kuzinga na kati ya nseke tii na kilumbu yina ya yandi kwisaka kumonika na meso ya bantu ya Israele.

? Yula bana :

 Bana sala bageste :

Bana yimba ti kina :

>|< Kumanisa lesu:

Bana, beto bakisa nde kukwisa ya Yesu Mwana ya Nzambi vandaka mambu ya nene-nene-nene na meso ya Nzambi. Yo yina, Yandi tindaka Yoane na ntwala, kaka sambu na kukangula Yesu nzila. Kana kukwisa ya Yesu vandaka mambu ya nene mutindu yina, yo ke lomba nde beto yamba Yandi na kiese yonso, mpi nde beto tula ngolo sambu bantu ya nkaka mpi kuwa nsangu ya Yandi sambu bo vanda na mpila kuyamba Yandi.

Devoir sambu na bakristo :

Devoir mono ke pesa beno bakristo, yo yai : Mposo yai, samba Nzambi nde bantu ya konso tribu to dikanda na nsi ya Congo, bo yonso kuwa ti bo yonso yamba nsangu ya mbote.

♥ Verse ya kulonguka:

Ti nge mwana na mono, bo ta binga nge profete ya Nzambi-Mpungu, sambu nge ta kwenda na ntwala ya Mfumu, sambu na kuyidikila Yandi banzila.

Luka 1 :76


Bana yimba nkunga :

Bana yimba mosi ya bankunga ya kwenda nzila mosi ti lesu yai.

Kubinga bana na Yesu :

Keti nge zaba nde nge me yamba Yesu, nge mosi ? Kana nge zaba yo ve, nge lenda yamba Yandi bubuyai. Beto ta vanda na kiese kusadisa nge kana nge ta kaka bikala na nima ya ecodim.

==NSUKA YA LESO 4

 Kana ntangu ikele--Kulonga mikanda ya Bible : Bangindu kele na nsuka ya mukanda yai.

Leso 4

Nzambi pesaka Zakaria ti Elisabeti mwana, ata bo me nuna. Mwana yina vandaka Yoane, yina Nzambi tindaka kuyidika nzila sambu na Yesu Mesia.



Leso 4

***Ti nge mwana na
mono, bo ta binga nge
profete ya Nzambi-
Mpungu,
sambu nge ta kwenda
na ntwala ya Mfumu,
sambu na kuyidikila
Yandi banzila.***

Luka 1 :76

Leso 5. Wanzio songaka Yozefi nde divumu ya Maria vandaka ya Nzambi.

Leso ya Nkufi : Wanzio songaka Yozefi nde Maria ta buta Yesu Mesia.

Matayo 1 :18-21

I. Preparatio ya moniteur

🎯 Kikuma ya lesu yai :

Beto ndima nde lukanu ya Nzambi kele mbote, ata beto bakisa yo ve, ata yo monika bonso mpasi.

♥ Verse ya kulonguka:

Lunungu na Nge/ kele tii kuna,/ ti Bansiku na Nge /kele kieleka kaka./ Bankunga 119 :142

🔊 Bankunga ya kwenda nzila mosi ti lesu yai :

Mfumumu Zaba Nzila na Mono
Mwana Yina Nani ?

II. Revisio

👆 Kubambuka lesu ya mposu me luta :

Beto me mona nde Nzambi yidikaka muntu mosi kukwenda na ntwala ya Yesu, kuyidikila Yandi nzila. Yandi nani ? (Yoane)

Nki mutindu Yoane songaka kiese, ata ntangu yandi vandaka na divumu ya mama, nde Mesia me kwisa ?

(Ntangu Maria kwisaka, mwana Yesu vandaka na divumu na yandi, ti mwana Yoane vandaka kunikana na kiese na divumu ya mama Elisabeti.)

III. Kulonga lesu yai

➔ Kuyantika lesu :

Wanzio kwisaka na Maria kusonga yandi nde yandi ta buta Mvulusi. Ata yandi me zaba bakala ve, Mpeve ya Nzambi ta sala yo. Kansi probleme mosi vandaka. Probleme ya ngolo. Maria vandaka dezia na fiancé, Yozefi. Bo me vukana ntete ve, yo yina, Yozefi zabaka nswalu nde mwana ya Maria vandaka divumu na yandi ve. Mambu ya mpasi ! Nki bo ta sala ? Beto vandaka na mukanda ya Luka, kansi ntangu yai beto kwenda na mukanda ya Matayo, kapu ya ntete.

🏠 Developpement (Banti ya malongi ya lesu yai na bandambu 4) :

5.1 Yo monikaka nde Maria vandaka na divumu ya Mpeve ya Nzambi. Matayo 1 :18

📖 Tangila bana :

18 Yesu Kristo butukaka mpidiyai : na nima mama na yandi Maria silaka kukwela Yozefi, ntangu bo me vukana ntete ve, yo monikaka nde yandi vandaka na divumu ya Mpeve ya Nzambi.

? Yula bana :

👤 Bana sala bageste :

👣 Bana yimba ti kina :

5.2 Yozefi yindulaka nki mpila ya luzitu kuzenga lukanu kukwela Maria. Matayo 1 :19

📖 Tangila bana :

19 Fianse na yandi Yozefi vandaka muntu mosi ya mbote. Kansi yandi zolaka ve kumonisa Maria nsoni na meso ya bantu. Yo yina yandi yindulaka kubikisa yandi na kinsweki.

? Yula bana :

👤 Bana sala bageste :

👣 Bana yimba ti kina :

5.3 Wanzio kwisaka na Yozefi na ndosi, ti songaka yandi nde Mwana ya Maria vandaka Mesia ya Nzambi. Matayo 1 :20-21

📖 Tangila bana :

20 Kansi ntangu yandi vandaka kuyindula mambu yina, tala ! Wanzio mosi ya Mfumumu Nzambi kwisaka kumonika na yandi na ndosi, kutuba nde : Yozefi, muntu ya dikanda ya Davidi, kuwa boma ve na kubaka Maria bonso nkento na nge. Sambu Mwana na divumu na yandi me katuka na Mpeve ya Nzambi.

21 Yandi ta buta Mwana-bakala. Nge ta pesa Yandi zina Yesu, sambu Yandi ta katula bantu na Yandi na masumu na bo.

? Yula bana :

👤 Bana sala bageste :

✍️ Bana yimba ti kina :

5.4 Yozefi lemfukaka na wanzio. Yandi kwelaka Maria, kansi zabaka yandi bonso bakala na yandi ve, tii na nima ya lubutuku ya Yesu. Matayo 1 :22-25

📖 Tangila bana :

22 Mambu yina yonso kubwaka sambu na kulungisa mambu ya Mfumu Nzambi songaka na munoko ya profete nde :

23 « Atasio ! Mwana-nkento ya me zabaka ntete bakala ve, yandi ta baka divumu, ti yandi ta buta Mwana-bakala. Bo ta pesa Yandi zina "Emmanuele" (disongidila nde, 'Nzambi kele na beto').

24 Ntangu Yozefi telamaka na mpongi, yandi salaka mambu ya wanzio ya Mfumu Nzambi songaka yandi. Yandi kotisaka Maria na nzo na yandi na kuvanda nkento na yandi.

25 Kansi Yozefi zabaka Maria ve tii na nima ya yandi me buta mwana ya bakala. Yozefi pesaka yandi zina: Yesu.

? Yula bana :

👤 Bana sala bageste :

✍️ Bana yimba ti kina :

>|< Kumanisa lesu:

Lukanu ya Nzambi vandaka mpasi sambu na Yozefi. Yandi zabaka ve nki bantu ta tuba. Kansi wanzio me songa yandi nde yai vandaka lukanu ya Nzambi. Yo vandaka mpasi sambu na Yozefi ti Maria mpi, kansi mbote sambu na beto. Mbote MINGI sambu na beto. Maria butaka Mvulusi ya kangulaka nzila beto kukwenda na bwala ya Nzambi. Lukanu ya Nzambi lenda monika mpasi, kansi yo kele konso ntangu mbote.

👋 Devoir sambu na bakristo :

Beno bakristo, devoir mono ke pesa beno mposi yai kele kundima na ntima na beno yonso nde lukanu ya Nzambi sambu na nge kele konso ntangu mbote. Kanga ntima na mpasi, ti tula Yandi ntima nde Yandi ke sala mambu mosi ya mbote.

♥ Verse ya kulunguka:

Lunungu na Nge/ kele tii kuna,/ ti Bansiku na Nge /kele kieleka kaka./ Bankunga 119 :142

Bana tuba yo mbala tatu. Na nima, kabisa bana na bandambu zole ti sala competisio.

👤 Bana yimba nkunga :

Bana yimba mosi ya bankunga ya kwenda nzila mosi ti lesu yai.

✝ Kubinga bana na Yesu :

Yesu kwisaka sambu na kukatula bantu na masumu na bo. Keti Yandi me katula masumu na nge ? Keti nge bambuka nki ntangu Yandi salaka yo ? Kana keti-keti kele na ntima, beto ta vanda na kiese kusolula ti nge ti kusadisa nge kubinga Yesu sambu Yandi katula masumu na nge bubu yai. Kwisa na beto na nima ya ecodim kana nge ke sosa lusadisu na mambu yina.

==NSUKA YA LESO 5

📖 Kana ntangu ikele--Kulonga mikanda ya Bible : Bangindu kele na nsuka ya mukanda yai.

Leso 5



Wanzio
songaka
Yozefi na
ndosi nde
Mwana na
divumu ya
Maria
vandaka ya
Nzambi.
Yandi
zabisaka
Yozefi nde
Mwana ya
Maria ta
vanda
Mvulusi,
Mwana-
Nzambi.

Leso 5

**Lunungu na Nge
kele tii kuna,**

**ti Bansiku na Nge
kele kieleka
kaka.**


Bankunga 119 :142

Leso 6. Lubutuku ya Yesu

Leso na Nkufi : Yozefi ti Maria kwendaka na Betlehemi sambu na kusonika bazina na bo, sambu na mpaku ya Roma. Kuna, bo monaka ve sika ya nkaka kulala. Yo yina, Yesu butukaka na nzo ya bambisi.

Luka 2 :1-7

I. Preparatio ya moniteur

 **Kikuma ya lesu yai :**

Beto yidikila Yesu kisika na ntima ti na luzingu na beto.

 **Verse ya kulonguka :**

Kansi bantu ya nkaka/ yambaka Yandi./ Bo ndimaka Yandi mpi/ na ntima na bo./ Ebuna Yandi pesaka bo kiyeka/ na kukituka bana ya Nzambi/ Yoane 1 :12

 **Bankunga ya kwenda nzila mosi ti lesu yai :**

Mwana Yina Nani ?

Na Mbeto ya Nsukami

II. Revisio


 **Kubambuka lesu ya mposo me luta :**

Beto me mona mpila Nzambi tindaka wanzio na Yandi na Maria ti na Yozefi kusonga bo nde Mwana yai ta vanda Mwana ya Nzambi. Yozefi me ndima. Yandi me baka Maria na nzo kuvanda nkento na Yandi, kansi bo me lala sikamosi ntete ve bonso bakala ti nkento.

III. Kulonga lesu yai

 **Kuyantika lesu :**

Ntangu yai, bo me wa nsangu ya leta. Bantu yonso fweti vutuka na bwala ya tata ya fami. Kuna, bo fweti sonika zina sambu na kupesa mpaku na leta. Divumu ya Maria me kuma nene, kansi bo fweti sala vwayze kaka.

 **Developpement (Banti ya malongi ya lesu yai na bandambu 3) :**

6.1 Yozefi na Maria kwendaka kusonika bazina na bo sambu na mpaku ya Roma, bonso leta

lombaka. Luka 2 :1-5

 **Tangila bana :**

1 Na ntangu yina Sezar Auguste, ntotila ya nene ya kimfumu ya Roma, tulaka nsiku nde bantu ya bansi yonso ya kimfumu na yandi, bo fweti sonikisa bazina na bo.

3 Ebuna bantu yonso kwendaka kusonikisa bazina na bo, konso muntu na bwala na yandi.

4 Yozefi mpi katukaka na bwala Nazareti na ntoto ya Galilea, kukwenda na bwala ya Mfumu Davidi, Betelemi, na ntoto ya Yudea, sambu yandi vandaka muntu ya dikanda ya Davidi.

5 Yandi kwendaka kusonikisa bazina na yandi ti fianse na yandi Maria, yina vandaka na divumu.

 **Yula bana :**

 **Bana sala bageste :**

 **Bana yimba ti kina :**

6.2 Ntangu bo vandaka kuna na Betlehemi, ntangu lungaka, ti Maria butaka Yesu.

Luka 2 :6-7a

 **Tangila bana :**

6 Ebuna ntangu bo vandaka kuna, kilumbu na yandi ya kubuta kulungaka.

7 Yandi butaka Mwana ya bakala, Mwana na yandi ya ntete.

 **Yula bana :**

 **Bana sala bageste :**

 **Bana yimba ti kina :**

6.3 Yesu butamaka na nzo ya bambisi sambu bo zwaka ve kisika na nzo ya banzenza.

 **Tangila bana :**

7b Yandi kangisaka Mwana na bitini ya lele ti tulaka Yandi na kima ya bambisi vandaka kudila madia na bo, sambu bo zwaka kisika ve na nzo ya banzenza.

? Yula bana :



Bana sala bageste :



Bana yimba ti kina :

>|< Kumanisa lesu :

Nzo ya banzenza vandaka kufuluka. Sika monikaka ve kuna sambu na Yesu kubutuka. Bo zabaka ve nde bo me buya kuyamba Mfumu ya Bamfumu Yonso, Mwana ya Nzambi. O, mawa na bo ! Keti beto kele na sika sambu na Yesu? Keti beto ta yidikila Yandi kisika na ntima ti na luzingu na beto ?



Devoir sambu na bakristo :

Devoir mono ke pesa beno bakristo na mposho yai, yo yai: Beno yindula na nki parti ya luzingu na beno, beno ke pesa Yesu sika ve. Beno lomba pardo, beno pesa Yandi sika na luzingu na beno yonso.

♥ Verse ya kulonguka :

Kansi bantu ya nkaka/ yambaka Yandi./ Bo ndimaka Yandi mpi/ na ntima na bo./ Ebuna Yandi pesaka bo kiyeka/ na kukituka bana ya Nzambi/ Yoane 1 :12

Bana tuba verse ndambu-ndambu na nima ya nge, moniteur. Bo tuba yo mbala zole. Na mbala ya tatu bo nangula diboko konso ntangu bo kuwa ndinga « Yandi. » Na mbala ya iya ti ya tanu bo sala bageste sambu na bandinga 'yambaka', 'ndimaka,' ti 'pesaka.' Na mbala ya nsuka, nge moniteur tuba phrase mosi ti bana tuba phrase ya ke landa yo.



Bana yimba nkunga :

Bana yimba diaka mosi ya bankunga ya kwenda nzila mosi ti lesu yai.



Kubinga bana na Yesu :

Mbala ya nkaka nge me wa zina yai "Yesu," kansi nge me yamba Yandi na ntima na nge ntete ve. Yandi me kitula nge ntete ve mwana ya Nzambi. O, mawa na nge ! Kansi nsangu ya mbote ! Yesu me yilama dezia kuyamba nge na fami ya Nzambi, kaka na ntangu ya nge ta yamba Yandi. Kana nge zola beto kusadisa nge kuyamba Yesu, nge lenda bikala

na nima ya ecodim. Kaka songa beto, « Mono zola ndima Yesu. » O, kiese ya mingi kana nge ta yamba Yandi bubu yai.

==NSUKA YA LESO 6



Kana ntangu ikele--Kulonga mikanda ya Bible : Bangindu kele na nsuka ya mukanda yai.

Leso 6

Maria butaka Yesu na nzo ya bambisi sambu sika vandaka ve na nzo ya banzenza na bwala Betelemi.



**Kansi bantu ya nkaka
yambaka Yandi.**

Leso 6

**Bo ndimaka Yandi mpi
na ntima na bo.**

**Ebuna Yandi pesaka bo
kiyeka na kukituka bana ya
Nzambi.**

Yoane 1 :12

Leso 7. Bamvungi monaka mwana Yesu ti songaka bantu ya nkaka

Leso na nkufi : Wanzio songaka bamvungi nde Mesia me butuka. Yo yina, bo kwisaka kumona Yandi. Na nima, bo zabisaka bantu ya nkaka.

Luka 2 :8-20

I. Preparatio ya moniteur

🕒 Kikuma ya lesu yai :

Beto zabisaka bantu ya nkaka nsangu ya mbote ya Yesu.

♥ Verse ya kulonguka :

10 Kansi wanzio tubilaka bo nde :/ “Beno kuwa boma ve./ Tala ! Mono me natila beno nsangu ya kiese mingi/ sambu na bantu yonso.

11 Na mpimpa yai, na bwala ya Davidi,/ Ngulusi me butuka sambu na beno./ Yandi keke Kristo (Mesia), Mfumu./ Luka 2 :10-11

🗺️ Bankunga ya kwenda nzila mosi ti lesu yai :

Kwenda Nord, Kwenda Sud
Yangalala, Bantu Yonso

II. Revisio

📖 Kubambuka lesu ya mposo me luta :

Beto sala nsaka kubambuka lesu ya mposo me luta. Mono ta tuba lesu na nkufi. Ebuna kana mono songa nge diboko, nge ta tesa kuyika ndinga mosi ya ta manisa fraze yina.

Beto me mona nde Yozefi ti Maria kwendaka na Betlehemi sambu na kusonika bazina na bo na mambu ya _____ (mpaku to leta). Kuna, bo zwaka ve kisika na kati ya _____ (nzo ya banzenza). Yo yina, Yesu butukaka na kati ya _____ (nzo ya bambisi.)

III. Kulonga lesu yai

➔ Kuyantika lesu :

Ntangu Yesu kwisaka, bo pesaka ve annonce na bwala. Bo bulaka ve bangoma. Bo kwisaka ve kukina. Kansi Nzambi zolaka nde bantu kuzaba nde

Mvulusi me kwisa. Yandi pesaka bantu ya nkaka annonce ya kitoko ti ya kuyituka.

🏠 **Developpement (Banti ya malongi ya lesu yai na bandambu 4) :**

7.1 Wanzio songaka bangungudi nde Mvulusi me butuka. Luka 2 :8-12

📖 Tangila bana :

8 Na kisika yina, kuvandaka bangungudi ...Bo vandaka kutala mameme na bo na mpimpa.

9 Ebuna, tala ! Wanzio ya Mfumu Nzambi kwisaka kutelama na ntwala na bo. Mwini ya Mfumu pelaka, yo ziungaka bo, ebuna boma ya nene simbaka bo.

10 Kansi wanzio tubilaka bo nde : “Beno kuwa boma ve. Tala ! Mono me natila beno nsangu ya mbote ya ta pesa kiese mingi na bantu yonso.

11 Na mpimpa yai, na bwala ya Davidi, Ngulusi me butuka sambu na beno. Yandi keke Kristo (Mesia), Mfumu.

12 Beno ta zaba Yandi mutindu yai : beno ta mona Mwana ya mpa ya bo me kangisa na bitini ya lele. Yandi me lala na sika ya bambisi ke dilaka madia na bo. »

? Yula bana :

👤 Bana sala bageste :

👣 Bana yimba ti kina :

7.2 Bawanzio mingi monikaka kupesa lukumu na Nzambi. Luka 2 :13-14

📖 Tangila bana :

13 Na kintulumukina, ndonga ya nene ya bawanzio ya zulu kwisaka kuvukana na wanzio yina kumaka ntete. Bo vandaka kumisa Nzambi na kutuba nde :

14 “Lukumu kuvanda na Nzambi na zulu, Ti ngemba kuvanda awa na nsi-ntoto na kati ya bantu.”

? Yula bana :



Bana sala bageste :



Bana yimba ti kina :

7.3 Bo monaka Yesu na sika ya vandaka kulala.

Luka 2 :15-16



Tangila bana :

15 Ebuna Ntangu bawanzio bikisaka bo ti vutukaka na zulu, bangungudi yina tubanaka nde : « Beto kwendeno na Betlehem. Beto tala mambu yina me bwa kuna, mutindu Mfumu Nzambi me zabisa bo.

16 Bo kwendaka nswalu, ebuna bo kwisaka kumona Maria, Yozefi ti Mwana...



? Yula bana :



Bana sala bageste :



Bana yimba ti kina :

7.4 Bo zabisaka bantu ya nkaka, ti bo kumisaka Nzambi. Luka 2 :17-20



Tangila bana :

17 Ntangu bamvungi monaka mwana, bo mwangaka mambu ya wanzio tubilaka bo sambu na Mwana yina.

18 Bantu yonso ya waka mambu ya bo vandaka kutuba, bo vandaka kuyituka.

20 Ebuna bangungudi ya mameme vutukaka. Bo vandaka kupesa Nzambi lukumu ti kutonda Yandi sambu na mambu yonso ya bo me wa ti ya bo me mona, sambu mambu yonso bwaka mutindu wanzio tubilaka bo.



? Yula bana :



Bana sala bageste :



Bana yimba ti kina :

>|< Kumanisa lesu:

Ntangu bangungudi me mona nde Yesu Mesia me butuka, bo kwendaka nswalu kusonga bantu ya nkaka. Beto mpi, Nzambi zola beto kusonga bantu ya nkaka, sambu Yandi zola nde bantu yonso vanda na mpila kuyamba Mwana na Yandi ti kuguluka.



Devoir sambu na bakristo :

Devoir beto ke pesa beno bakristo kele kukwenda kusonga bampangi na nge nde Yesu kele Mesia mpi Ngulusi. Keti nge lenda solula nsangu ya Yesu ti mpangi mosi mposo yai ?



Verse ya kulonguka :

10 Kansi wanzio tubilaka bo nde :/ “Beno kuwa boma ve./ Tala ! Mono me natila beno nsangu ya kiese minqi/ sambu na bantu yonso.

11 Na mpimpa yai, na bwala ya Davidi,/ Nqulusi me butuka sambu na beno./ Yandi kele Kristo (Mesia), Mfumu./ Luka 2 :10-11

Bana tuba yo na ndambu-ndambu na nima na nge, fraze par fraze mbala zole. Na nima, bo tuba yo mbala iya diaka na bandinga ya nkaka—ngolo, pima, na zulu, na nsi, etc.



Bana yimba nkunga :

Bana yimba mosi ya bankunga ya kwenda nzila mosi ti lesu yai.



Kubinga bana na Yesu :


Yesu kele Ngulusi. Nzambi tindaka Yandi na nsi ntoto yai sambu nge guluka. Kana nge me yamba Yandi ntete ve, keti nge ta yamba Yandi bubu ? Nge lenda binga Yandi konso sika ya nge ikele, kansi kana nge ke na mfunu ya lusadisu, beto kele awa sambu na nge. Kwisa songa beto na nima ya ecodim nde nge zola ndima Yandi.

==NSUKA YA LESO 7



Kana ntangu ikele--Kulonga mikanda ya

Bible : Bangindu kele na nsuka ya mukanda yai.



Leso 7

**Wanzio
songaka
bamvungi
nde
Mesia me
butuka.
Na nima
bo me
kwenda
kutala
Yandi, bo
zabisaka
bantu ya
nkaka.**

Leso 7

Kansi wanzio tubilaka bo nde :

“Beno kuwa boma ve.

**Tala ! Mono me natila beno nsangu
ya kiese mingi sambu na bantu
yonso.**

Na mpimpa yai, na bwala ya Davidi,

**Ngulusi me butuka sambu na beno.
Yandi kele Kristo (Mesia), Mfumu.**

Luka 2 :10-11

Leso 8. Bibuti nataka Bebe Yesu na Nzo-Nzambi

Leso na Nkufi : Yozefi ti Maria zengaka Mwana Yesu na mpila Nzambi me songa, ebuna bo pesaka Yandi zina. Baprofete Simeoni ti Anna kumisaka Nzambi sambu Mesia me kwisa.

Luka 2 :21-38

I. Preparatio ya moniteur

🕒 Kikuma ya lesu yai :

Beto zitisa Nzambi na kiese sambu Mesia me kwisa bonso Mwini na ntoto yai ya mpimpa.

♥ Verse ya kulonguka:

Yandi (Mesia) kele Mwini/ yina ta songa bamimpani/ nzila na Nge./ Luka 2 :32a

🗨️ Nkunga ya kwenda nzila mosi ti lesu yai :

Mwana Yina Nani ?

Mwini na Mono

II. Revisio

⬆️ Kubambuka lesu ya mposo me luta :

Na mposo me luta, beto monaka nde bawanzio monikaka na bangungudi. Bo songaka bo nde Yesu Mesia Mvulusi me butuka. Bangungudi kwendaka nswalu kumona Mwana Yesu, sika Yandi vandaka kulala na nzo ya bambisi. Yo yitukaka ngolo, ebuna bo songaka bantu mingi mambu ya bo me mona.

III. Kulonga lesu yai

➔ Kuyantika lesu :

Ntangu yina, bantu ya zabaka nde Yesu Mesia me butuka vandaka nani ?

Ee, bangungudi ti bantu ya bo songaka. Maria ti Yozefi. Yoane-Baptiste zabaka Yesu dezia na divumu ya mama na Yandi, ti bibuti na yandi Zakaria ti Elizabeti. Ntangu yai, beto ta mona mpila ndambu bantu ya nkaka kwisaka kuzaba mambu yina mpi.

🏠 Developpement (Banti ya malongi ya lesu yai na bandambu 3) :

8.1 Yozefi ti Maria nataka Mwana Yesu na nzo Nzambi na mpila ya bansiku ya Nzambi me pesa bantu ya Israele. Luka 2 :21-24

📖 Tangila bana :

21 *Na nima ya bilumbu nana, ntangu ya kuzenga Mwana lungaka. Ntangu yina, bo pesaka Yandi zina : Yesu, zina ya wanzio songaka na Maria na ntwala yandi me baka divumu.*

22 *Ebuna ntangu ya kudikatula na bansiku lungaka, mutindu bansiku ya Moize vandaka kutuba. Bo nataka Mwana na Yeruzalemi sambu na kusonga Yandi na Mfumu Nzambi,*

23 *mutindu bo sonikaka na mikanda ya Bansiku ya Mfumu Nzambi... »*

? Yula bana :

👤 Bana sala bageste :

👣 Bana yimba ti kina :

8.2 Nzambi songaka profete Simeoni nde Mwana Yesu vandaka Mesia. Ebuna yandi kumisaka Nzambi. Luka 2 :25-35

📖 Tangila bana :

25 *Ebuna, tala! Kuvandaka muntu mosi na Yeruzalemi, zina na yandi Simeoni. Yandi vandaka muntu mosi ya masonga ti ya kinzambi. Yandi vandaka kuingila Mesia...*

26 *Mpeve vandaka me zabisa yandi nde yandi ta fwa ve tii kuna yandi ta mona Mesia ya Mfumu Nzambi me silaka.*

27 *Mpeve ya Nzambi tindaka Simeoni na kwenda kukota na Nzo-Nzambi. Tata ti mama ya Mwana Yesu, bo nataka Yandi kuna sambu na kusadila Yandi mambu ya Bansiku vandaka kusonga.*

28 *Ebuna Simeoni bakaka Mwana na maboko na yandi, ti yandi kumisaka Nzambi, nde :*

29-30 « *Mfumu, Ntangu yai, Nge lenda bikisa sielo na Nge kufwa na ngemba, mutindu Nge me sila. Sambu meso na mono, mono me mona Ngulusi na Nge,*

31-32 *Yandi ya Nge me sola na meso ya bantu yonso. Mwini yina ta songa bamimpani nzila na nge. Yandi kele lukumu na bantu na nge ya Israele.»*

34-35 *Ntangu yina, Simeoni sakumunaka bo. Yandi tubilaka Maria mama ya Yesu nde : « Nzambi me sola Mwana yaiEbuna nge mosi, mpasi ta tobula ntima na nge bonso mbele. »*

? Yula bana :

 Bana sala bageste :

 Bana yimba ti kina :

8.3 Nzambi songaka profete ya nkento Ana kiteso mosi mpi, ti Ana mpi kumisaka Nzambi.

Luka 2 :36-38

 Tangila bana :

36 *Kuvandaka mpi nkento mosi, zina na yandi Ana. Yandi vandaka profete ya Nzambi ya nkento.... Yandi vandaka mununu...*

37 *....Yandi vandaka konso ntangu na Nzo-Nzambi. Kuna, yandi vandaka kusadila Nzambi na lombilu mpimpa ti mwini...*

38 *Na ntangu yo yina kaka, Ana kwisaka kukuma, ebuna yandi yantikaka kupesa mersi na Nzambi. Yandi vandaka kutuba mambu ya Mwana Yesu na bantu yonso yina vandaka kuingila nde Nzambi kugulusa bo.*

? Yula bana :

 Bana sala bageste :

 Bana yimba ti kina :

>|< Kumanisa leso:

Bantu zole yai, Simeoni ti Ana, vandaka kuingila

Mesia. Yo yina, Nzambi songaka bo ntangu Yandi me kwisa. O, bo vandaka kuyangalala ti kumona kiese ! Bo vandaka kumisa Nzambi sambu Mesia me kwisa. Beto mpi fweti mona kiese mingi. Beto fweti vutula Nzambi matondo na matondo sambu Yesu Mesia me kwisa.

 **Devoir sambu na bakristo :**

Beno bakristo, devoir mono ke pesa beno, kumisa Nzambi konso lumbu sambu Yandi me tindila beto Mesia Yesu Kristo.

♥ **Verse ya kulonguka :**

Verse na beto bubu yai kele ndambu na bandinga ya Simeoni tubaka sambu na Yesu:

Yandi (Mesia) kele mwini/ yina ta songa bamimpani/ nzila na Nge./ Luka 2 :32a

Bo lenda tuba yo malembe-malembe na nima na nge mbala sambanu. Bo lenda tuba yo ya kuvanda ti maboko na zulu ya ntu, ya kutelama na dikulu mosi kaka, ya kubalula, na maboko kusimba nitu, etc. Na nima, bana tanu meka kutuba yo mosi-mosi, bana ya nkaka vanda bazuzi kana bo me tuba mbote.


 **Bana yimba nkunga :**

Simeoni tubaka nde Yesu kele mwini ya ta songa bamimpani nzila ya Nzambi. Yo yina, bana yimba nkunga yai, "Mwini na Mono."

 **Kubinga bana na Yesu :**

Simeoni ti Ana zabaka nde Yesu vandaka Mesia ya Nzambi me sila na beto, bantu. Bo yambaka Yandi na kiese. Keti nge mpi me yamba Yandi na kiese? Kana nge zaba ve kana nge me yamba Yesu Kristo, nge lenda zenga mambu yina bubuyai. Bikala na nima ya ecodime ti beto ta sadisa nge.

==Nsuka ya Leso 8

 **Kana ntangu ikele--Kulonga mikanda ya Bible :** Bangindu kele na nsuka ya mukanda yai.



Yozefi ti Maria nataka Mwana Yesu na Nzo-Nzambi. Kuna, profete Simeoni ti profete ya nkento Ana bakisaka nde Yandi vandaka Mesia. Bo kumisaka Nzambi sambu na Yandi.

Leso 8

***Yandi (Mesia)
kele mwini
yina ta songa
bamimpani nzila
na Nge.***

Luka 2 :32a

Leso 9. Bandwenga ya Este kwisaka kusamba Mwana Yesu.

Leso na nkufi : Mbwetete monikaka na bandwenga. Bo landaka yo, ebuna bo sambilaka Mwana Yesu ti pesaka Yandi makabu.

Matayo 2 :1-12

I. Preparatio ya moniteur

🕒 Kikuma ya lesa yai :

Beto sosa Yesu na ntima na beto yonso. Beto samba Yandi sambu Yandi ke lunga kubaka bisambu.

♥ Verse ya kulonguka :

Ntangu bo kotaka na nzo,/ bo monaka Mwana yina,/ ti mama na Yandi, Maria./ Bo fukamaka, ti bo sambaka Yandi./ Matayo 2:11a

👤 Bankunga ya kwenda nzila mosi ti lesa yai :

Emmanuele
Mfumu ya Bamfumu Yonso
O Bwala ya Fioti, Betlehem

II. Revisio

📖 Kubambuka lesa ya mposo me luta :

Na bamposo me luta, beto me mona nde bangungudi monaka Mwana Yesu, ti bo kumisaka Yandi. Baprofete zole na Nzo-Nzambi bakisaka nde Yesu vandaka Mesia. Bo mpi kumisaka Nzambi. Bantu yai yonso vandaka bansukami, ti bo vandaka kuna na Betlehem to penepene na yo.

III. Kulonga lesa yai

➔ Kuyantika lesa :

Kansi Nzambi zola nde bantu yonso kuwa nsangu ya Mwana na Yandi. Bubuyai beto ta mona mpila Yandi bendaka bantu ya kiyeka, bamfumu, bantu ya bansi ya ntama. Luzolo na Yandi kele nene kusosa bantu na bansi yonso, konso muntu yina ta ndima Yandi.

🏠 Developpement (Banti ya malongi ya lesa yai na bandambu 4) :

9.1 Bandwenga katukaka na nsi ya Este, bo landaka mbwetete. Yo twadisaka bo na Yeruzalemi.

📖 Tangila bana :

1 Na nima Yesu me butuka na bwala Betelemi, na ntoto ya Yudea, ntangu Erode vandaka ntotila kuna, bantu ya mayele mingi katukaka na ndambu ya Este...na bwala Yeruzalemi.

2 Bo vandaka kuyula nde : “Wapi Mwana me butuka kuvanda Ntotila ya Bayuda ? Beto me mona mbwetete na Yandi ntangu yo monikaka na ndambu ya Este, ebuna beto me kwisa sambu na kusamba Yandi.”

? Yula bana :

👤 Bana sala bageste :

👣 Bana yimba ti kina :

9.2 Ntotila Erode bingaka balongi ya Bible, bo songaka yandi nde Mesia fweti butuka na Betlehem. Yandi lombaka bamfumu yina kuvutuka kusonga yandi wapi kibeni Mesia kele.

📖 Tangila bana :

3 Ntangu ntotila Erode waka mambu yina, yandi ...vandaka ntima na zulu.

4 Erode vukisaka bambuta yonso ya banganga-Nzambi ti balongi yonso ya Bansiku. Na nima, yandi yulaka bo nde : « Mesia fweti butuka wapi ? »

5 Bo vutulaka yandi nde : ‘Na bwala Betelemi, na ntoto ya Yudea, sambu profete (Mishee) sonikaka mpidiyai nde :

6 Nge bwala Betelemi, na ntoto ya Yudea, ya kieleka, nge kele bwala mosi ya mfunu na kati ya babwala ya Yudea, Sambu Mfumu yina ta basika na nge...’ ”

7 Ebuna na mayele yonso, Erode bingaka bantu yina katukaka na ndambu ya Este. Yandi yulaka bo nki ntangu mpenza mbwetete yina monikaka, ti bo zabisaka yandi.

8 Na nima, yandi tindaka bo na Betelemi. Yandi tubaka nde : “Beno kwenda kusosa

Mwana yina mbote-mbote. Kana beno me mona Yandi, beno kwisa zabisa mono, sambu mono mpi kwenda kusambila Yandi."

? Yula bana :

👤 Bana sala bageste :

✍️ Bana yimba ti kina :

9.3 Mbwetete twadisaka bo na nzila. Ebuna bo kwisaka na nzo ya Yesu, bo sambaka Yandi.

📖 Tangila bana :

9 Ntangu bo waka kutuba ya ntotila, bo simbaka nzila, bo kwenda ka bo. Na nzila bo monaka diaka mbwetete ya bo monaka ntete na ndambu ya Este. Yo kwendaka na ntuala na bo tii yo kwisaka kutelama na zulu ya kisika ya Mwana vandaka.

11 Ntangu bo kotaka na nzo, bo monaka Mwana yina, ti mama na Yandi, Maria. Bo fukamaka, ti bo sambaka Yandi. Bo kangulaka bamwa-sanduku na bo, ti bo pesaka Yandi makabu yai :wolo ti bima ya mananasi ti mire.

? Yula bana :

👤 Bana sala bageste :

✍️ Bana yimba ti kina :

9.3 Nzambi zabisaka bo na ndosi nde bo vutuka na Erode ve.

📖 Tangila bana :

12 Na nima, Nzambi zabisaka bo na ndosi nde : "Beno vutuka na Erode ve." Yo yina, bo vutukaka na nsi na bo na nzila ya nkaka.

? Yula bana :

👤 Bana sala bageste :

✍️ Bana yimba ti kina :

>|< Kumanisa leso:

Bantu ya nsi yai na Este bakisaka nde Nzambi me songa bo Mwana na Yandi, Mesia yina fweti kwisa. Bo sambaka Yandi, sambu Yandi kele lunga kubaka

lukumu. Yandi bikisaka zulu sambu na kukwisa kugulusa beto, bantu ya bansi yonso. Beto samba Yandi na kieleka yonso.

👤 Devoir sambu na bakristo :

Beno bana bakristo, devoir mono ke pesa beno yo yai : Konso lumbu na mposi yai, beno samba Yesu. Pesa Yandi lukumu, sambu Yandi me lunga.

♥ Verse ya kulonguka :

Ntangu bo kotaka na nzo,/ bo monaka Mwana yina,/ ti mama na Yandi, Maria./ Bo fukamaka, ti bo sambaka Yandi./ Matayo 2 :11a

Bana tuba verse yai ndambu-ndambu na nima ya nge. Bo yika bageste. Bo tuba yo mbala sambanu.

👤 Bana yimba nkunga :

Bana yimba mosi ya bankunga ya kwenda nzila mosi ti leso yai.

✝ Kubinga bana na Yesu :

Tala bamfumu yai salaka voyage ya nda kaka sambu na kukwisa na Yesu. Nge, nge fweti sala vwayaze ve. Nge fweti kaka kwikila na ntima, ebuna binga zina na Yandi na munoko. Kaka ndima nde nge kele muntu ya masumu, nge kele na mfunu na Yandi kugulusa nge. Kana nge ta ndima Yandi, Yandi ta ndima nge! Konso ntangu, kana nge ke na mfunu ya lusadisu na mambu yai, kaka bikala na nima ya ecodim sambu beto sadisa nge.

==Nsuka ya Leso 9

📖 Kana ntangu ikele--Kulonga mikanda ya Bible : Bangindu kele na nsuka ya mukanda yai.

Leso 9



Bamfumu ya bansi ya ndambu ya est monaka mbwetete special. Bo bakisaka nde yo vandaka kidimbu nde Mesia me butuka. Bo salaka vwyaze ya ntama sambu na kusamba Mwana Yesu. Yesu kele Mesia-Mvulusi sambu na bantu ya bansi yonso.



**Ntangu
bo kotaka
na nzo,
bo**

**monaka Mwana yina,
ti mama na Yandi,
Maria.**

**Bo fukamaka, ti bo
sambaka Yandi.**

Matayo 2 :11a

Leso 10. Nzambi bumbaka Mwana na Yandi.

Leso na Nkufi : Nzambi bumbaka Yesu na Ezipte sambu Erode na kimpala zolaka kufwa Yandi.

Matayo 2 :13-18

I. Preparatio ya moniteur

🕒 Kikuma ya lesa yai :

Kuzaba nde Nzambi lundaka Mwana na Yandi, ti Yandi mpi ke lunda beto sambu lukanu na Yandi ya mbote kusalama.

♥ Verse ya kulonguka :

Nzambi kele mukebi ti ngolo na beto.

Yandi kele awa sambu na kusadisa beto na ntangu ya mpasi. Bankunga 46 :2

🗨️ Bankunga ya kwenda nzila mosi ti lesa yai :

Ya' Ke Na Ntoto Yonso na Maboko
Mfumu Zaba Nzila na Mono
Mwana Yina Nani ?

II. Revisio

⬆️ Kubambuka lesa ya mposo me luta :

Moniteur, nge tanga sommaire ya lesa me luta. Kana nge mona kidimbu 🗨️ _____, nge songa mwana mosi diboko, ti yandi fweti tuba ndinga to phrase ya ke landa.

Na mposo me luta, beto monaka mpila bamfumu na bansi ya este monaka 🗨️ _____ (mbwetete) na zulu. Bo bakisaka nde yai vandaka kidimbu kusonga bo nde 🗨️ _____ (Mesia me butuka). Bo kwisaka na Yerusalemi na Mfumu Erode. Yandi tindaka kuyula balongi ya Bible wapi Mesia fweti 🗨️ _____ (butuka). Bo nde, Bible ke songa Yandi ta butuka na bwala 🗨️ _____ (Betelehem). Bo monaka Yandi. Bo fukamaka ti 🗨️ _____ (sambaka Yandi). Bo pesaka Yandi makabu. Ata Mfumu Erode me lomba bo kuvutuka kusonga yandi wapi na Betelehem Mesia vandaka, wanzio ya Nzambi songaka bo 🗨️ _____ (kuvutuka na Erode ve, kansi kuvutuka na nsi na bo na nzila ya nkaka.)

III. Kulonga lesa yai

➔ Kuyantika lesa :

Keti nge me kwenda na bampangi sambu na kuzomba mbisi? Kuzomba mbisi sambu na madia kele mbote, kansi kuzomba muntu kele mbote ve. Mfumu Erode songaka bamfumu ya Este nde bo vutuka kusonga yandi wapi na Yerusalemi Mesia vandaka. Yandi tubaka nde yandi mpi zolaka kusamba Yandi.

Kansi yandi zolaka ve kusamba Yesu. Yandi vandaka na kimpala nde mfumu ya mpa kumonika, bantu kulanda Yandi. Yandi sosaka kufwa Mwana Yesu. Kansi Yesu lenda kufwa mutindu yina ve. Yandi fweti kufwa na zulu ya kulunsi sambu Yandi vanda Mvulusi na beto. Bubuyai beto ta mona mpila Tata Nzambi lundaka Yandi.

🏠 Developpement (Banti ya malongi ya lesa yai na bandambu 3) :

10.1 Wanzio ya Nzambi zabisaka Yozefi kutina na Ezipte, sambu Erode ta sosa kufwa Mwana Yesu. Matayo 2 :13

📖 Tangila bana :

13 Ntangu bo me kwenda, wanzio mosi ya Mfumu Nzambi kwisaka kumonika na Yozefi na ndosi. Yandi nde : "Telama, baka Mwana ti mama na Yandi. Beno tina na nsi ya Ezipte. Beno bikala kuna tii ntangu ya mono ta songa nge, sambu Erode ta sosa Mwana sambu na kufwa Yandi."

? Yula bana :

👤 Bana sala bageste :

👣 Bana yimba ti kina :

10.2 Yozefi salaka mutindu wanzio songaka yandi. Matayo 2 :14-15

📖 Tangila bana :

14 Yozefi telamaka, yandi bakaka mwana ti mama na yandi, ebuna na mpimpa bo kwendaka na Ezipte.

15 Yandi bikalaka kuna tii ntangu ya Erode fwaka. Mambu yina bwaka mutindu yina sambu na kulungisa mambu ya bapofete me tuba...

? Yula bana :



Bana sala bageste :



Bana yimba ti kina :

10.3 Erode fwaka bana mingi na mabanza nde na kati fweti vanda Yesu, kansi Nzambi vandaka kulunda Mwana na Yandi na kati ya Ezipte. Matayo 2 : 16-18



Tangila bana :

16 Ntangu Erode bakisaka nde bamfumu-bandwenga ya Este me kusa yandi, yandi waka makasi mingi mpenza. Yandi tindaka bantu na kufwa bana yonso ya bakala, na bwala Betelemi ti na babwala yonso penepene na yo. Bo fwaka bana ya bamvula zole ti na nsi na yo...

17 Mpidina, mambu yina ya profete Yeremia tubaka, yo kwisaka kulunga...

? Yula bana :



Bana sala bageste :



Bana yimba ti kina :

>|< Kumanisa lesu:

Nzambi lungaka Mwana na Yandi Yesu Kristo, sambu lukanu ya Nzambi vandaka ve nde Yesu kufwa na diboko ya Erode, kansi Yesu kufwa na zulu ya kulunsi sambu na kukatula masumu na beto.

Beto bana ya Nzambi, beto lenda tula ntima nde Nzambi mpi ke lunda beto bonso kele lukanu na Yandi. Beto vanda na boma ve, ata bantu yindula mbi to sala mbi. Nzambi ke lundaka bana na Yandi !



Devoir sambu na bakristo :

Beno bakristo, beno vanda na ngemba na ntima. Vutula Nzambi matondo konso lumbu nde Yandi kele na lukanu ya mbote sambu na luzingu na nge, Yandi mpi kele na lukanu ya mbote ata sambu na lufwa na nge.



Verse ya kulonguka :

Nzambi kele mukebi ti ngolo na beto.

Yandi kele awa sambu na kusadisa beto na ntangu ya mpasi. Bankunga 46 :2



Bana yimba nkunga :

Bana yimba mosi ya bankunga ya kwenda nzila mosi ti lesu yai.



Kubinga bana na Yesu :

Kansi, kana nge me yamba Yesu ntete ve, nge kele ve na Mukebi bonso Nzambi. Na bampasi ya luzingu, nge kele ve na Muntu kusadisa nge bonso Nzambi. O, mawa !

Kansi nge lenda kuma mwana ya Nzambi kaka bubuyai--kaka sika nge kele. Na ntima na nge yonso, kaka balula ntima. Songa Nzambi nde nge kele muntu ya masumu ke na mfunu ya Yesu. Songa Yandi nde nge kwikila Yesu kele Mwana ya Nzambi yina fwaka sambu na masumu na nge, ye telamaka na lufwa. Lomba Yandi kukota ntima ti luzingu na nge, kukatula masumu na nge, kupesa nge moyo ya kimpeve, mvu ya mvu. Tonda Yandi sambu Yandi me gulusa nge bubuyai.

Kana nge me sala yo bubuyai mbala ya ntete, na ntima na nge, kwisa kusonga beto na nima ya ecodim, sambu beto kuyangalala ti nge.

==NSUKA YA LESO 10



Kana ntangu ikele--Kulonga mikanda ya

Bible : Bangindu kele na nsuka ya mukanda yai.

Leso 10

Wanzio songaka Yozefi kunata Maria ti Mwana Yesu na Ezipte. Yandi bumbaka bo kuna sambu Erode kufwa Mwana Yesu ve.



Leso 10

**Nzambi kele mukebi ti ngolo
na beto.**

**Yandi kele awa
sambu na kusadisa beto
na ntangu ya mpasi.**

Bankunga 46 :2

Leso 11. Yezu na fami vutukaka na Nazareti ti Yandi kulaka kuna ti kumaka ngolo na Ndinga ya Nzambi.

Leso na Nkufi : Ntangu Yandi lungisaka bamvula 12, Yandi vandaka na Nzo-Nzambi kulonga banlongi ya Ndinga ya Nzambi.

Matayo 2 :19-23, Luka 2 :39-52 Matayo 13 :55-56

I. Preparatio ya moniteur

🕒 Kikuma ya lesu yai :

Beto zola kuma ngolo na ndinga ya Nzambi.

♥ Verse ya kulonguka :

Bonso babebe ya fioti, beno vanda na nzala ya mabele ya kieleka ya Ndinga ya Nzambi, sambu beno ke na mfunu na yo sambu na kuyela.

1 Piere 2 :2

🔊 Bankunga ya kwenda nzila mosi ti lesu yai :

Kuwa Bible

Mwana Yina Nani ?

II. Revisio

⬆️ Kubambuka lesu ya mposo me luta :

Na mposo me luta, beto monaka mpila Erode zolaka kufwa Mwana Yesu, ti mpila Nzambi lundaka Mwana na Yandi sambu Yandi kufwa ve.

III. Kulonga lesu yai

➔ Kuyantika lesu :

Beto me bika Yozefi, Maria ti Mwana Yesu na Ezipte. Wanzio ya Nzambi songaka bo kukwenda kuna, ebuna wanzio ya Nzambi songaka bo diaka nki ntangu vutuka.

🏠 Developpement (Banti ya malongi ya lesu yai na bandambu 4) :

11.1 Wanzio zabisaka Yozefi nki ntangu kuvutuka na nsi na bo, nki kusala diaka na ntangu ya boma. Yo yina, bo kwisaka kuzinga na bwala ya Nazareti. **Matayo 2 :19-23**

📖 Tangila bana :

19 Na nima Erode me fwaka, wanzio mosi ya Mfumu Nzambi kwisaka kumonika na Yozefi na ndosi na nsi ya Ezipte.

20 Yandi nde : “Telama, baka Mwana ti mama na Yandi, ebuna beno vutuka na nsi ya Israele, sambu bayina zolaka kufwa Mwana, bo me fwaka.”

21 Ebuna Yozefi telamaka. Yandi bakaka Mwana ti mama na Yandi, ti bo kuvutukaka na nsi ya Israele.

22 Kansi ntangu Yozefi waka nde Arkelausi me yinga tata na yandi Erode sambu na kuyala na Yudea, yandi waka boma kukwenda kuna. Nzambi tubilaka yandi diaka na ndosi. Yo yina, yandi kwendaka na ntoto ya Galilea.

23 Yandi kwisaka kuzinga na bwala mosi, zina na yo Nazareti...

? Yula bana :

👤 Bana sala bageste :

👣 Bana yimba ti kina :

11.2 Yesu vandaka kukula, kukuma ngolo na mambu yonso. **Luka 2 :39-40**

📖 Tangila bana :

39 Ntangu tata ti mama ya Yesu me sala mambu yonso ya Bansiku ya Mfumu Nzambi songaka, bo vutukaka ti Yesu na bwala na bo Nazareti, na ntoto ya Galilea.

40 Ebuna Mwana vandaka kukula. Yandi vandaka kwisa ngolo ti kifuluka na Mpeve. Yandi fulukaka mpi na mayele, ti nlemvo ya Nzambi vandaka na zulu na Yandi.

? Yula bana :

👤 Bana sala bageste :

👣 Bana yimba ti kina :

11.3 Ntangu Yesu me lungisa bamvula 12, Yandi vandaka ngolo kusolula ti bambuta ya Israele na nzo-Nzambi ti kuyula bo bangiufula ya ngolo. **Luka 2 :41-52**

 **Tangila bana :**

41 *Tata ti mama ya Yesu vandaka kukwenda na Yeruzalemi konso mvula sambu na Nkinsi ya Paki.*

42 *Ebuna, ntangu Yandi me lungisa bamvula kumi na zole, bo kwendaka na Yeruzalemi...*

43 *Ntangu bo manisaka bilumbu ya nkinsi, bo yantikaka kuvutuka. Kansi Mwana Yesu me bikaka na Yeruzalemi, ata (bo) zabaka yo ve.*

44 *Bo yindulaka nde Yesu vandaka sikamosi ti bantu ya vandaka kutambula nzila mosi ti bo. Yo yina, na nima bo salaka kilumbu mosi na nzila, bo yantikaka kusosa Yandi na kati ya bampangi ti banduku na bo.*

45 *Kansi bo monaka Yandi ve. Yo yina bo vutukaka na Yeruzalemi sambu na kusosa Yandi.*

46 *Ebuna na kilumbu ya tatu, bo monaka Yandi na Nzo-Nzambi. Yandi me vanda na kati ya balongi ya Bayuda. Yandi vandaka kuwa bo ti kuyula bo bangiufula.*

47 *Bantu yonso ya vandaka kuwa Yandi, bo yitukaka na mayele na Yandi ti na bamvutu Yandi vandaka kupesa.*

48 *Ntangu bo monaka Yandi, bo yitukaka ngolo. Mama na Yandi yulaka Yandi nde : « Mwana na mono, sambu na nki Nge me sala beto mpidiyai ?... »*

49-50 *Yandi vutulaka nde : "... Keti beno zabaka ve nde Mono fweti vanda kusala makambu ya Tata na Mono ? » Kansi bo bakisaka ve mambu ya Yandi tubilaka bo.*

51-52 *Na nima, Yesu vutukaka ti bo na Nazareti. Yandi vandaka kulemfuka na bo... Yesu vandaka kukula. Yandi vandi kukuma mpi mayele. Nzambi ti bantu vandaka kuzola Yandi mingi.*

 **Yula bana :**

 **Bana sala bageste :**

 **Bana yimba ti kina :**

11.4 Yesu yelaka na nzo ya charpentie ti baleki na Yandi yonso. Matayo 13 :55-56

 **Tangila bana :**

55 *Keti Yandi kele Mwana ya charpentie ve ? Keti Maria kele mama na Yandi ve ? Keti Yakobo, Yozefi, Simoni ti Yude, bo kele baleki na Yandi ve ?*

56 *Keti bampangi na Yandi yonso ya bankento kele awa na kati na beto ve ? Ebuna, mambu yai yonso Yandi ke tuba, Yandi me baka yo wapi?*

 **Yula bana :**

 **Bana sala bageste :**

 **Bana yimba ti kina :**

>|< Kumanisa leso :

Yesu kumaka ngolo na Ndinga ya Nzambi. Beto mpi lenda vanda kuluta ngolo na Ndinga ya Nzambi kana beto tanga yo, kuwa yo, yindula yo, ti yidika ntima kulemfuka na yo.

Devoir sambu na bakristo :

Bana bakristo, devoir mono ke pesa beno bubuyai kele kutanga Bible konso lumbu, to kuwa muntu ya nkaka kutangila nge, ebuna kuyindula nki nge me tanga.

Verse ya kulonguka :

Bonso babebe ya fioti, beno vanda na nzala ya mabele ya kieleka ya Ndinga ya Nzambi, sambu beno ke na mfunu na yo sambu na kuyela
1 Piere 2 :2

Mabele yina kele ndinga ya Nzambi. Beto kunwa yo ntangu beto tanga to kuwa ti yindula yo.

Bana tuba verse na nima ya nge ndambu-ndambu mbala sambanu. Bo sala bageste kusonga kuwa nzala, kunwa mabele, ti maboko kukangula bonso Bible kusonga « ya kimpeve »

Bana yimba nkunga :

Bana yimba mosi ya bankunga ya kwenda nzila mosi ti leso yai.

 **Kubinga bana na Yesu :**


Kana nge me bakisa Bible mbote, yo ta twadisa nge na Yesu Kristo sambu na kutula Yandi ntima, kundima nde Yandi kele Mwana ya Nzambi me kwisa kugulusa beto.

Konso mposo mono fweti yula kestio yai, sambu yo kele mfunu mingi: Keti nge me yamba Yesu ? Kana ve, Yandi ta yamba nge bubuyai kana nge ta ndima nde nge kele muntu ya masumu na mfunu na Yandi. Kana nge zola kusamba ti beto sambu na mambu yina, kwisa kutala beto na nima ya ecodim.

==NSUKA YA LESO 11



Kana ntangu ikele--Kulonga mikanda ya Bible : Bangindu kele na nsuka ya mukanda yai.



Mwana Yesu solulaka ti bambuta, balongi ya Ndinga ya Nzambi, sambu Yandi vandaka ngolo na Ndinga ya Nzambi.

Leso 11

**Bonso babebe ya fioti,
beno vanda na nzala ya mabele
ya kieleka ya Ndinga ya Nzambi,
sambu beno ke na mfunu na yo
sambu na kuyela.**

1 Piere 2 :2

Leso 12. Yoane yantikaka kulonga ti kubotika bantu sambu na kuyidikila Yesu nzila.

Atasio, moniteur! Na ntwala kulomba bana kubaka mbotika, nge fweti zikisa nde dibundu na nge ke sala yo kana kitemwe ya mwana kele ngolo. Kana dibundu ndima ve, pesa bo ngindu nde bo sosa yo na age ya dibundu ke ndima.

Leso na Nkufi : Yoane Baptiste yantikaka kulonga nde Mesia ke kwisa na nima na yandi. Yo yina, bantu yilama kuyamba Yandi, bo baka mbotika kusonga nde bo me balula ntima.

Matayo 3 :1-6, Marko 1 :1-6, Luka 3 :1-6, Yoane 1 :19-23

I. Preparatio ya moniteur

☉ Kikuma ya lesu yai :

Beto baka mbotika na nima beto me balula ntima.

♥ Verse ya kulonguka:

“Beno bantu ya masumu,/ beno balula ntima,/ beno baka mbotika.../” Luka 3 :3

🗨️ Bankunga ya kwenda nzila mosi ti lesu yai :

Kana Nge Me Vuluswa (vs. 3 “kubaka mbotika”) Mono Kele na Nzo Kitoko (vs. ya nsuka, « Baka mbotika, nge mukristo, na kati ya masa. »

II. Revisio

↑ Kubambuka lesu ya mposu me luta :

Na mposu me luta, beto me mona nde Yesu vutukaka na Nazareti ti Maria na Yozefi. Yesu mpi yelaka na ndinga ya Nzambi. Na ntangu Yandi me lungisa bamvula kumi na zole, dezia Yandi vandaka na mpila kusolula ti kuyula bakestio ya balongi ya nene-nene ya Bible. Beto monaka nde Maria ti Yozefi butaka bana ya nkaka, baleki ya Yesu.

III. Kulonga lesu yai

➔ Kuyantika lesu :

Ntangu lutaka, ebuna ntangu lungaka sambu na Yesu kuyantika kusalu na Yandi. Kansi na ntwala na Yandi, Nzambi zolaka kutinda Yoane sambu na kuyidikila Yandi nzila.

🏠 Developpement (Banti ya malongi ya lesu yai na bandambu 4) :

12.1 Nzambi songaka Yoane nde ntangu me lunga, ebuna yandi yantikaka kulonga ti kubotika bantu yina balulaka ntima.

📖 Tangila bana :

Luka 3 :2 ...Na ntangu yina, Nzambi tubaka na Yoane, mwana ya Zakaria, ntangu Yoane vandaka na ntoto ya zelo na zelo.

3 Ebuna Yoane yantikaka kutambula na babwala yonso vandaka na ndambu ya nzadi ya Yordani. Yandi vandaka kusamuna nde: “Beno bantu ya masumu, beno balula ntima, beno baka mbotika, ebuna Nzambi ta lolula beno”

Matayo 3 :5 Bantu vandaka kukatuka na bwala Yeruzalemi, na ntoto yonso ya Yudea ti na babwala yonso vandaka na ndambu ya nzadi ya Yordani. Bo vandaka kwenda na kuwa yandi.

6 Bo vandaka kundima masumu na bo na meso ya bantu, ebuna Yoane vandaka kubotika bo na nzadi ya Yordani.

? Yula bana :

👤 Bana sala bageste :

👣 Bana yimba ti kina :

12.2 Malongi ya Yoane lungisaka profesu ya profete Yezaya tubaka kiteso ya bamvula 600 na ntwala yo me salama.

📖 Tangila bana :

Marko 3 :3 Yoane kele muntu yina ya profete Yezaya songaka, ntangu yandi tubaka nde : “Muntu mosi ke tuba ngolo na ntoto ya zelo na zelo: ‘Beno yidika nzila ya Mfumu, Beno sungika bamwa-nzila na Yandi!’”

? Yula bana :

👤 Bana sala bageste :

 **Bana yimba ti kina :**

12.3. Yoane vandaka kulwata ti kudia na mpila ya nkaka.

 **Tangila bana :**

Marko 1 :6

6 Yoane vandaka kulwata lele ya mika ya mbisi yai shamo. Yandi vandaka kulwata mpi mukaba ya mpusu ya mbisi na luketo na yandi. Yandi vandaka kudia bampasu ti bwiki.

? Yula bana :

 **Bana sala bageste :**

 **Bana yimba ti kina :**

12.4 Yoane tubaka nde yandi vandaka Mesia ve, kansi ksalu na yandi kuyidikila Mesia nzila.

 **Tangila bana :**

Yoane 1 :19-20 Yai vandaka kitemwe ya Yoane pesaka, ntangu Bayuda tindaka banganga-Nzambi ...na kwenda kuyula yandi nde : “Nge kele nani ?...Yandi nde: “Mono kele Mesia ve.”

22 Ebuna bo yulaka yandi, “Nge kele nani? Beto fweti pesa mvutu na bantu ya tindaka beto. Nge tuba nde nge kele nani ?”

23 Yoane nde : “Mono kele ndinga ya muntu mosi ke boka na ntoto ya zelo na zelo: ‘Beno yidika nzila ya kusungama sambu na Mfumu,’ bonso profete Yezaya tubaka.

? Yula bana :

 **Bana sala bageste :**

 **Bana yimba ti kina :**

>|< Kumanisa lesa:

Kisalu ya Yoane kuyidika nzila sambu na Yesu Mesia. Bantu ya waka malongi ya Yoane, mingi monaka mawa sambu na masumu na bo. Bo balulaka ntima, ebuna Yoane botikaka bo.

Kiteso mosi na beto bubuyai. Ntete, Nzambi zola bantu kubakisa mbi ya bo me sala. Bo balula ntima

na Yesu Mesia. Na nima, bo baka mbotika sambu na kusonga nde bo me balula ntima.

 **Devoir sambu na bakristo :**

Bana bakristo, keti beno me baka mbotika na nima beno me balula ntima ? Kana ve, devoir mono ke pesa beno kele kusolula mambu yina ti bibuti na beno. Kana bo ta ndima, kwenda kusonika zina na nge na bantu ya ta landa malongi ya mbotika.


 **Verse ya kulonguka:**

“Beno bantu ya masumu,/ beno balula ntima,/ beno baka mbotika.../” Luka 3 :3

Bana tuba verse ndambu na ndambu, ti geste ya kusonga kubalula ti mbotika. Bo tuba yo mbala sambanu. Na nima, kana ntangu lunga, bo ya zola, bo lenda meka kutuba yo muntu mosi-mosi.


 **Bana yimba nkunga :**

Bana yimba mosi ya bankunga ya kwenda nzila mosi ti lesa yai.

 **Kubinga bana na Yesu :**


Bana zaba mbote nde mbotika ikele sambu na bakristo. Mbotika yo mosi ta gulusa nge ve. Yo ta kitula nge mwana ya Nzambi ve. Ntete nge fweti ndima masumu na nge ti balula ntima. YINA kitula nge mukristo ti mwana ya Nzambi. Kana nge me sala yo ntete ve, sala yo bubuyai.

==Nsuka ya Leso 12


 **Kana ntangu ikele--Kulonga mikanda ya Bible :** Bangindu kele na nsuka ya mukanda yai.

Leso 12

Yoane longaka nde bantu balula ntima , bo yilama sambu na kuyamba Mesia. Bo ya ndimaka, yandi botika bo.



**“Beno bantu ya
masumu,
beno balula ntima,**



**beno baka
mbotika...”**

Luka 3 :3

Leso 13. Yoane songaka bantu nki mutindu kubalula ntima.

Leso na Nkufi : Yoane longaka bantu nki mutindu luzingu na bo fweti shange kana bo balula ntima

Luka 3 :7-14

I. Preparatio ya moniteur

🎯 **Kikuma ya lesu yai :**

Muntu na muntu ta yindula mbote kana yandi me balula ntima ya kieleka. Kana muntu me balula ntima, yandi songa yo na luzingu na yandi.

♥ **Verse ya kulonguka :**

Beno sala mambu/ yina ke songa nde/ beno me balula ntima./ Luka 3 :8

🔊 **Bankunga ya kwenda nzila mosi ti lesu yai :**

2 Korinto 5:17

Kana Nge Zaba Nge Me Vuluswa (tula ngolo na refrain na yo)

II. Revisio

👆 **Kubambuka lesu ya mposu me luta :**

Na mposu me luta, beto monaka nde nani yantikaka kulonga bantu ? (Yoane Baptiste.)
Kisalu na yandi nki ? (Kuyidika nzila sambu na kukwisa ya Mesia.)

III. Kulonga lesu yai

➔ **Kuyantika lesu :**

Bubuyai beto ta mona ndambu ya malongi ya Yoane Baptiste. Yandi songaka bantu kubalula ntima, kansi kana bantu zola sala yo, bo fweti balula nki na luzingu na bo ?

🏠 **Developpement (Banti ya malongi ya lesu yai na badambu 3) :**

13.1 Yandi (Yoane) longaka bo na bandinga ya ngolo. Bo yindula ve nde bo kele mbote ti Nzambi kaka sambu bo kele Bayuda, bana ya Abrahami.

📖 **Tangila bana :**

Luka 3 :7 Bantu mingi vandaka kwisa na Yoane sambu na kubaka mbotika. Yandi vandaka kutubila bo nde : « Beno banyoka ya makasi ! Nani songaka beno nde beno tina makasi ya Nzambi ya fweti kwisa ?

8 Yo yina, beno sala mambu ya ke songa nde beno kieleka me balula ntima. Beno yantika ve kudituba nde : 'Abrahami nkaka na beto.' Sambu mono ke tubila beno nde ata na matadi yai, Nzambi lenda tedimisa bana sambu na Abrahami ! »

? **Yula bana :**

👤 **Bana sala bageste :**

✍️ **Bana yimba ti kina :**

13.2 Yandi songaka bo nde zuzema ya Nzambi vandaka penepene.

📖 **Tangila bana :**

Luka 3 :9 Ata sesepi yai, Nzambi me baka soka sambu na kuzenga banti na misisa na yo. Konso nti ya ke butaka bambuma ya mbote ve, Nzambi ta zenga yo ti losa yo na tiya. »

? **Yula bana :**

👤 **Bana sala bageste :**

✍️ **Bana yimba ti kina :**

13.3 Na bo ya zolaka kubalula ntima, yandi songaka bo nki bo fweti sala—konso muntu na mpila na yandi.

📖 **Tangila bana :**

Luka 3 :10 Bantu vandaka kuyula Yoane nde : "Ebuna nki beto fweti sala ? »

Na bakalaki ya kufutisa mpaku—

12 Bakalaki ya vandaka futisaka mpaku kwisaka mpi kusosa mbotika. Bo yulaka yandi nde : « Longi, nki beto fweti sala ? »

13 Yandi nde : « Ntangu beno ke futisa bantu mpaku, beno lutisa ve ntau ya leta me tulaka. »

Na basoda--

14 Kiteso mosi, basoda kwisaka kuyula yandi nde : « Ebuna beto, nki beto fweti sala ? »

Yandi nde : « Beno baka mbongo ya bantu na kingolo-ngolo ve. Beno funda bo mpi ve na mambu ya luvunu sambu na kubaka mbongo na bo. Beno vanda na kiese na salere ya beno ke bakaka.”

? Yula bana :

👤 Bana sala bageste :

👉 Bana yimba ti kina :

>|< Kumanisa lesu:

Bana, bantu mingi tuba nde bo me balula ntima, kansi keti yo kele kieleka ? Yoane ke tuba nde kubalula ntima kele ve kaka mambu ya munoko. Kana kieleka muntu me balula ntima, yo fweti monika na luzingu na yandi. Na ntwala Yesu kota na ntima, beto mingi yindula kaka mambote ya beto mosi. Kansi ntangu ya Yesu kota, Yandi twadisa beto na mutindu ya nkaka. Beto yantika kuyindula mambote ya bantu ya nkaka. Mbala ya nkaka, na ntwala ya Yesu, beto vandaka kuyiba. Kana beto me balula ntima, beto ta zola kuyiba diaka ve, kansi kusadisa bantu ya nkaka.

Nki nge banza ta salama na muntu ya kele na munoko ya mvinda ? [Moniteur, kuwa mvutu ya bana.] (Ee, Yesu ta sukula munoko na yandi.)

Kana muntu zola ve bantu ya makanda ya nkaka? (Ee, Yesu ta balula ntima na yandi na mpila nde yandi yantika kuzola bo.)

👏 Devoir sambu na bakristo :

Beno bana bakristo, nki Yesu zola kubalula na luzingu na nge ? Yindula yo, ti lomba lusadisu na Yandi na mposo yai sambu Yandi sadisa nge na mambu yina.

♥ Verse ya kulonguka :

Beno sala mambu/ yina ke songa nde/ beno me balula ntima./ Luka 3 :8

Na nima bana me tuba verse mbala tatu, bo mosi meka kutula ton ti ritima sambu na kukitula yo nkunga. Bo yimba yo diaka mbala 3 to kuluta.

👤 Bana yimba nkunga :

Bana yimba mosi ya bankunga ya kwenda nzila mosi ti lesu yai.

✝ Kubinga bana na Yesu :


Kana kieleka nge me balula ntima na Yesu, luzingu na nge fweti shange. Kana nge me bikala kaka mpila ya nge vandaka, yindula mbote kana ya kieleka nge me yambaka Yesu. Kana nge ke zaba mbote-mbote ve, bikala na nima ya ecodim bubuyai, ebuna beto ta solula ti nge ti samba ti nge sambu nge zaba mbote.

==NSUKA YA LESO 13

📖 Kana ntangu ikele--Kulonga mikanda ya Bible : Bangindu kele na nsuka ya mukanda yai.

**Yoane songaka bantu nki
mutindu luzingu ta baluka kana
bo me balula ntima.**

Leso 13



Leso 13

***Beno sala mambu
yina ke songa nde***



Ntima TI Luzingu

beno me balula ntima.

Luka 3 :8

Leso 14. Yoane songaka Yesu bonso Mesia ti Mwana-Dimeme ya Nzambi.

Leso na nkufi : Yoane Baptiste songaka nde Yesu vandaka Mesia ya Nzambi silaka, mpi Mwana-Dimeme ya Nzambi, yina ta katula masumu ya bantu.

Luka 3 :15-18, Yoane 1 :29-30a

I. Preparatio ya moniteur

🎯 **Kikuma ya lesu yai :**

Muntu na muntu ta ndima Yesu Mvulusi na yandi, ti na nima bakwidi ta baka mbotika kusonga yo.

♥ **Verse ya kulonguka:**

Lumbu ya landaka, Yoane monaka Yesu ke kwisa na yandi. Ebuna yandi tubaka nde, “Atasio ! Yandi yai Mwana-Dimeme ya Nzambi, Yandi ya ta katula masumu ya bantu ya nsi-ntoto yai. » Yoane 1 :29

🗣️ **Bankunga ya kwenda nzila mosi ti lesu yai :**
Mo’ Kwikila Bible (vs. 3 : Yesu fwilaka nge)
Mono Zola Yesu Ngulusi

II. Revisio

👆 **Kubambuka lesu ya mposo me luta :**

Na mposo me luta, beto vandaka kumona ndambu ya malongi ya Yoane Baptiste. Yandi vandaka kusonga bantu nki mutindu luzingu na bo fweti songa nde bo me balula ntima.

III. Kulonga lesu yai

➔ **Kuyantika lesu :**

Mposo yai, beto landa diaka na malongi ya Yoane Baptiste. Beto me kuma na malongi na yandi sambu na Yesu.

🏠 **Developpement (Banti ya malongi ya lesu yai na bandambu 3) :**

14.1 Yoane vandaka kubuya mabanza ya bantu nde yandi vandaka Mesia.

📖 **Tangila bana :**

Luka 3 :15 Bantu vandaka kubakisa nde mambu ya nene ke kwisa, ti bo yonso vandaka

kuyindula nde : ‘Ziku Yoane kele Mesia to ve.’

16 Yo yina, Yoane tubilaka bo yonso nde : “Mono, ke kieleka nde mono ke botika beno na masa, kansi Muntu kuluta ngolo ti mono ke kwisa. Mono me fwana ve na kukangula bansinga ya basandale na Yandi. Yandi ta botika beno na Mpeve-Santu ti na tiya.

? **Yula bana :**

👤 **Bana sala bageste :**

👣 **Bana yimba ti kina :**

14.2 Yoane vandaka kulonga mambu mingi.

📖 **Tangila bana :**

Luka 3 :18 Yoane vandaka kusonga bantu mambu ya nkaka diaka mingi.

? **Yula bana :**

👤 **Bana sala bageste :**

👣 **Bana yimba ti kina :**

14.3 Ntangu Yesu lutaka, Yoane songaka bantu nde Yandi yai Mesia, Mwana-Dimeme ya Nzambi.

📖 **Tangila bana :**

Yoane 1 :29 Lumbu ya landaka, Yoane monaka Yesu ke kwisa na yandi. Ebuna yandi tubaka nde, “Atasio! Yandi yai Mwana-Dimeme ya Nzambi, Yandi ya ta katula masumu ya bantu ya ntoto yai. »

30 Yandi yai Muntu ya mono tubaka nde : « Na nima na mono ke kwisa Muntu ya kele kuluta mfunu ti mono, sambu Yandi vandaka na ntwala na mono.

? **Yula bana :**

👤 **Bana sala bageste :**

👣 **Bana yimba ti kina :**

>\< Kumanisa lesa:

Kisalu ya nene ya Yoane kuyidika ntima ya bantu kuyamba Yesu Mesia, ti kusonga Yandi bu ntangu me lunga. Ntangu yai, yandi me songa bantu pwelele nde Yesu vandaka Mesia, Mwana-dimeme ya ta lungisa nkailu ya Nzambi ta ndima. Yesu salaka mpidina bu Yandi fwaka na sika na beto. Keti nge me yamba Yesu bonso Mvulusi na nge? Kana nge me yamba Yandi, keti nge mpi me baka mbotika sambu na kusonga yo ?

👏 Devoir sambu na bakristo :

Bana bakristo, beto ke yula beno diaka mambu ya mbotika. Kana nge me botama ntete ve, nki ke kanga nge nzila ? Kwisa solula yo ti beto. Kana nge me botama, pesa encouragema na bampangi ti banduku ya nkaka ya me yamba Yesu kusala kiteso mosi.

♥ Verse ya kulonguka :

Yoane 1 :29 Lumbu ya landaka, Yoane monaka Yesu ke kwisa na yandi. Ebuna yandi tubaka nde, "Atasio! Yandi yai Mwana-Dimeme ya Nzambi, Yandi ya ta katula masumu ya bantu ya ntoto yai. »

🗣️ Bana yimba nkunga :

Bana yimba mosi ya bankunga ya kwenda nzila mosi ti lesa yai.

✝️ Kubinga bana na Yesu :


Keti nge me yamba Yesu ? Yandi, Mwana-dimeme ya Nzambi, me pesa moyo na Yandi na sika na nge. Bantu ya mbi fwaka Yandi na sika na nge. Kansi lufwa manisaka Yandi ve. Yandi telamaka na lufwa. Bubuyai kana nge ta tula Yandi ntima, Yandi lenda shange ntima na nge. Yandi lenda pesa nge moyo ya mpa. Keti nge me binga Yandi na ntima na nge ?

==Nsuka ya Leso 14

📖 Kana ntangu ikele--Kulonga mikanda ya

Bible : Bangindu kele na nsuka ya mukanda yai.

Leso 14



Yoane monaka Yesu ti songaka bantu nde “Mwana-Dimeme ya Nzambi, Mvulusi, Yandi yai.”

Yoane 1 :29

**Lumbu ya landaka, Yoane monaka
Yesu ke kwisa na yandi.**

**Ebuna yandi tubaka nde, “Atasio!
Yandi yai Mwana-Dimeme ya
Nzambi,**

**Yandi ya ta katula masumu ya
bantu ya ntoto yai. »**

Leso 15. Yoane botikaka Yesu.

Leso na nkufi : Yoane botikaka Yesu na masa sambu Yesu lombaka yo. Tata Nzambi songaka kiese na Yesu na mambu yina, ti Mpeve kulumukaka na zulu na Yandi.

Matayo 3 :13-17, Luka 3 :23a

I. Preparatio ya moniteur

🎯 Kikuma ya lesu yai :

Beto ta baka mbotika na nima beto me balula ntima na Yesu. Beto baka yo ve sambu na kuguluka, kansi beto baka yo kusonga bantu nde beto me guluka.

♥ Verse ya kulunguka :

(Bandinga ya Yesu na balonguki na Yandi) Yo yina, beno kwenda/ kukumisa bantu balonguki na Mono/ na kati ya bansi yonso./ Beno botika bo na zina ya Tata Nzambi/ ti Mwana Nzambi ti Mpeve ya Longo”/ Matayo 28 :19

🗨️ Bankunga ya kwenda nzila mosi ti lesu yai :

Kana Nge Me Vuluswa, Kubaka Mbotika Mbotika Ta Vulusa Nge Ve Mono Kele Na Nzo Kitoko (Kubaka Mbotika, Nge Mukristo, na kati ya Masa)

II. Revisio

👆 Kubambuka lesu ya mposo me luta :

Na mposo me luta, beto monaka nde Yoane songaka bantu pwelele nde Yesu vandaka Mwana-Dimeme ya Nzambi ya kwisaka kukatula masumu ya bantu. Yandi vandaka Mesia.

III. Kulonga lesu yai

➔ Kuyantika lesu :

Beto me mona nde Yoane botikaka bantu na nima bo me balula ntima. Yai songaka na bantu yonso nde bo me zenga kulanda Nzambi. Kansi Yesu Yandi mosi, keti Yandi mpi bakaka mbotika ? Yandi vandaka na mfunu ve kubalula ntima. Sambu na nki ? (Ee, sambu Yandi salaka masumu ve. Yandi salaka kaka mbote.) Keti Yandi mpi ta baka mbotika ?

🏠 Developpement (Banti ya malongi ya lesu yai na bandambu 4) :

15.1 Yesu kwisaka na nzadi ya Yordani sambu na kubaka mbotika na maboko ya Yoane.

📖 Tangila bana :

Matayo 3 :13 Ntangu yai, Yesu katukaka na ntoto ya Galilea, ebuna Yandi kwendaka na nzadi ya Yordani sambu na kubaka mbotika na Yoane.

? Yula bana :

👤 Bana sala bageste :

👣 Bana yimba ti kina :

15.2 Yoane monaka nde yandi lungaka ve kupesa Yesu mbotika, kansi yandi ndimaka kusala yo sambu Yesu tubaka nde yo ta lungisa luzolo ya Nzambi. Matayo 3 :14-15

📖 Tangila bana :

Matayo 3 :14 Kansi Yoane zolaka ve. Yandi nde: “Mono muntu zolaka kubaka mbotika na Nge. Nki mutindu Nge me kwisa awa na mono ?”

15 Kansi Yesu vutulaka nde: “Bika yo vanda mpidina ntangu yai. Mbote beto lungisa luzolo ya Nzambi.” Ebuna Yoane ndimaka.

? Yula bana :

👤 Bana sala bageste :

👣 Bana yimba ti kina :

15.3 Na nima ya mbotika ya Yesu, Tata Nzambi songaka kiese na Yandi na Mwana na Yandi.

📖 Tangila bana :

Matayo 3 :16 Ntangu Yesu me botama imene, Yandi basikaka na masa. Ebuna, atasio ! Zulu kangukaka na zulu na Yandi, ti Yandi monaka Mpeve ya Nzambi ke kwisa kukulumuka bonso pizio. Yo kwisaka kupumbuka na zulu ya ntu na Yandi.

17 Kintulumukina, ndinga katukaka na zulu nde : “Mwana na Mono ya luzolo, Yandi yai. Mono ke na kiese mingi sambu na Yandi.”

? Yula bana :

👤 Bana sala bageste :

👣 Bana yimba ti kina :

15.4 Na nima ya mbotika, Yesu yantikaka kisalu na Yandi, na age ya 30 ans.

📖 Tangila bana :

Luka 3 :23a Yesu vandaka kiteso ya bamvula makumi tatu ntangu Yandi yantikaka kisalu na Yandi sambu na Nzambi...

? Yula bana :

👤 Bana sala bageste :

👣 Bana yimba ti kina :

>|< Kumanisa lesu:

Yesu bakaka mbotika ve sambu Yandi me balula ntima. Yandi me sala mbi ve, yo yina, Yandi vandaka na mfunu na kubalula ntima ve. Kansi Yandi salaka yo sambu na kupesa Nzambi kiese, kulungisa luzolo na Yandi. Mbala ya nkaka yo vandaka mpi kupesa mbandu sambu na beto.

Kana Yesu bakaka mbotika, yo ke songa nde Nzambi ke na kiese ntangu beto mpi balula ntima, ebuna kubaka mbotika.

👋 Devoir sambu na bakristo :

Nge mwana mukristo, kana nge me baka mbotika, kiese mingi sambu na nge. Devoir mono ke pesa nge na mposu yai kele kuyula muntu ya nkaka kana yandi me balula ntima na Yesu.

♥ Verse ya kulonguka:

(Bandinga ya Yesu na balonguki na Yandi)

Yo yina, beno kwenda/ kukumisa bantu balonguki na Mono/ na kati ya bansi yonso./ Beno botika bo na zina ya Tata Nzambi/ ti Mwana Nzambi ti Mpeve ya Longo”/ Matayo 28 :19

Ntangu bana tuba verse yai ndambu na ndambu,

bo sala bageste sambu ‘kwenda’ ti ‘botika bo’

💡 Bana yimba nkunga :

Bana yimba mosi ya bankunga ya kwenda nzila mosi ti lesu yai.

✝ Kubinga bana na Yesu :


Mbotika ya bakristo ke pesa Nzambi kiese bonso mbotika ya Yesu pesaka Yandi kiese. Kansi mbotika yo mosi ta gulusa nge ve, kana nge me tula ntima na Yesu ntete ve. Kana nge me ndima Yandi na ntima na nge yonso ntete ve, O, sala yo bubuyai. Kukungi diaka ve. Yesu ta gulusa nge bubu kana nge binga kaka zina na Yandi. Kana nge ke na mfunu ya lusadisu na mambu yai, kwisa na mono na nima ya ecodim. Mono ta vanda na kiese na kusadisa nge.

==NSUKA YA LESO 15



Kana ntangu ikele--Kulonga mikanda ya Bible : Bangindu kele na nsuka ya mukanda yai.

Leso 15



**Na nima Yesu
bakaka mbotika,
Mpeve ya
Nzambi
kulumukaka
bonso pizio na
zulu ya ntu na
Yandi. Ndinga
katukaka na
zulu nde,
“Mwana na
Mono ya luzolo,
Yandi yai. Mono
ke na kiese
mingi sambu na
Yandi.”**

**Yo yina, beno kwenda
kukumisa bantu balonguki
na Mono na kati ya bansi
yonso.**

**Beno botika
bo na zina ya
Tata Nzambi
ti Mwana**

**Nzambi ti Mpeve ya
Longo”**



Matayo 28 :19

Leso 16. Yesu nungaka mpukumunu ya ngolo. Yandi vutulaka Satana kaka Ndinga ya Nzambi.

Malongi na nkufi : Satana kwisaka kutesa Yesu na mpila na mpila, kansi Yesu nungaka mpukumunu yonso kukonda kusala masumu.

Matayo 4 :1-11, Marko 1 :13a

I. Preparatio ya moniteur

🕒 Kikuma ya lesu yai :

Beto vanda mingi na ndinga ya Nzambi, sambu yo lenda sadisa beto bakristo kununga mpukumunu yonso ya Satana.

❤ Verse ya kulonguka :

Mono me bumba bansiku na Nge na ntima na mono, sambu mono kusala masumu ve na meso na Nge. Bankunga 119 :11

🗣 Bankunga ya kwenda nzila mosi ti lesu yai :

Kuwa Bible
O, Bible Kele Kieleka

II. Revisio

⬆ Kubambuka lesu ya mposo me luta :

- ⬆ Na mposo me luta, beto me mona nde nani bakaka mbotika ? (Yesu Kristo.)
- ⬆ Nani tubaka nde, 'Mwana na Mono ya Mono ke zolaka mingi, Yandi yai'? (Tata Nzambi)

III. Kulonga lesu yai

➔ Kuyantika lesu :

Ntangu me lunga sambu Yesu kuyantika kisalu na Yandi. Yandi kwendaka kuvanda Yandi mosi, kubuya madia, kaka kusamba, sambu Yandi zabaka nde ntangu me lungu kuyantika kisalu na Yandi. Kansi mbeni ya Nzambi Satana vandaka na kiese ve nde Yesu yantika malongi na Yandi. Yandi tulaka ngolo kubebisa kisalu ya Yesu ata na ntwala yo yantikaka. Bubuyai beto ta mona mpila Satana mekaka Yesu Kristo.

🏠 **Developpement (Banti ya malongi ya lesu yai na bandambu 4) :** [Moniteur, tala nde 15.3 kele na bamdambu 3 mpi.]

16.1 Yesu vandaka kubuya madia mpi kusamba Nzambi bilumbu 40. Luka 4 :1a, Matayo 4 :1-2

📖 Tangila bana :

Luka 4 :1a Ebuna Yesu vandaka na kufuluka na Mpeve ya Nzambi. Yandi bikisaka nzadi ya Yordani

Matayo 4 :1 1 Ntangu yai, Mpeve ya Nzambi nataka Yesu na ntoto ya zelo na zelo sambu Satana kumeka Yandi.

2 Na nima Yesu me sala bilumbu makumi iya ya mpimpa ti ya mwini kukonda madia, nzala simbaka Yandi.

? Yula bana :

👤 Bana sala bageste :

👣 Bana yimba ti kina :

16.2 Satana kwisaka kumeka Yesu. Bambisi ya makasi mpi vandaka kuna ya lenda pesa kingonsa.

📖 Tangila bana :

Marko 1 :13a Yandi vandaka kuna bilumbu makumi iya. Satana vandaka kumeka Yandi. Bambisi mpi vandaka kuna.

? Yula bana :

👤 Bana sala bageste :

👣 Bana yimba ti kina :

16.3 Mbala tatu, Satana songaka Yesu kulanda ndinga na yandi Satana sambu na kusonga nde Yandi vandaka Mwana-Nzambi. Kansi Yesu vandaka kuvutula Satana ndinga ya Nzambi kaka. Yo yina, Yandi nungaka bampukumunu yonso.

Mpukumunu ya ntete—Kitula matadi yo kuma mampa. Matayo 4 :3-4

📖 Tangila bana :

Matayo 3 :3 Satana kwisaka na Yesu, ebuna yandi tubilaka Yandi nde : « Kana Nge kele Mwana-Nzambi, tuba na matadi yai, yo kuma mampa. »

4 Kansi Yesu vutulaka nde : «Mukanda ya Nzambi nde : ‘Muntu ta zinga ve na madia kaka, kansi yandi ta zinga mpi sambu na konso ndinga ya basika na munoko ya Nzambi. »

? Yula bana :



Bana sala bageste :



Bana yimba ti kina :

9 Satana songaka Yandi nde : « Yai yonso ya Nge ke mona, mono ta pesa Nge yo. kana Nge ta fukama ti sambila mono. »

10 Kansi Yesu vutulaka nde : « Katuka, Satana ! Sambu Mukanda ya Nzambi nde : ‘Nge fweti samba Mfumu Nzambi na nge. Kaka Yandi mpamba nge fweti samba ! »

? Yula bana :



Bana sala bageste :



Bana yimba ti kina :

Mpukumunu ya zole—Kudilosa na ntoto Matayo 4 :5-7



Tangila bana :

5 Ntangu yai Satana nataka Yesu na bwala ya santu Yeruzalemi. Yandi tulaka Yandi na zulu ya ludi ya Nzo-Nzambi,

6 ebuna yandi nde : « Kana Nge kele Mwana-Nzambi, kudilosa na ntoto. Sambu Mukanda ya Nzambi ke songa nde : ‘Nzambi ta songa bawanzio na Yandi kulunda Nge,’

Ti diaka, ‘Bo ta nata Nge na maboko na bo, Na mpila nde dikulu na Nge ta tutana ve na ditadi.’ »

7 Yesu tubilaka yandi nde : « Mukanda ya Nzambi ke songa beto mpi nde : ‘Beno meka Mfumu Nzambi na nge ve. »

? Yula bana :



Bana sala bageste :



Bana yimba ti kina :

Mpukumunu ya tatu—Kusamba Satana sambu na kubaka bimfumu ya nsi-ntoto.



Tangila bana :

Matayo 4 :8 Diaka, Satana nataka Yesu na zulu ya ngumba ya nda mpenza. Yandi songaka Yandi bimfumu yonso ya nsi-ntoto ti lukumu na yo.

16.4 Na nima, Satana kwendaka, ebuna bawanzio kwisaka kusadisa Yesu. Matayo 4 :11



Tangila bana :

11 Ntangu yai, Satana bikaka Yandi ; bawanzio kwisaka kukuma, bo yantikaka kusadila Yesu.

? Yula bana :



Bana sala bageste :



Bana yimba ti kina :

>|< Kumanisa lesa :

Yesu nungaka Satana na mpila Yandi vandaka kuvutula yandi ndinga ya Nzambi. Bandinga ya Yesu tubaka, yo vandaka baverse ya Bible ya Kuwakana ya Ntama, ya Yesu zabaka na ntima na Yandi.

Kana beto zaba ndinga ya Nzambi mbote, na ntangu ya mpukumunu, Nzambi lenda bambukisa beto baverse ya ta sadisa beto ti pesa beto ngolo, mpi.



Devoir sambu na bakristo :

Kana nge kele mukristo, devoir mono ke pesa nge mposo yai kele kutula kuluta ngolo na Ndinga ya Nzambi. Meka kutanga ndambu na yo to kuwa ndambu na yo konso lumbu. Yindula yo, ti tula ngolo kulemfuka na yina ya Bible ke tuba.

♥ **Verse ya kulonguka :**

Mono me bumba bansiku na Nge na ntima na mono, sambu mono kusala masumu ve na meso na Nge. Bankunga 119 :11

Bana tuba yo mbala tatu, ebuna bo yidika ton ti ritime, bo mosi kitula yo nkunga. Bo yimba yo diaka mbala tatu to kuluta.

🗣️ **Bana yimba nkunga :**

Bana yimba mosi ya bankunga ya kwenda nzila mosi ti lesu yai.

✝️ **Kubinga bana na Yesu :**

Keti nge ikele mukristo, mulandi ya Yesu ? Ketu nge kwikila Yandi ? Zaba nde Yesu, Mwana ya Nzambi, ke zola nge mingi. Yandi fwaka sambu na masumu na nge, ti Yandi telamaka na lufwa. Yandi ta gulusa nge bubuyai kana nge ta balula ntima na Yandi. Kana nge zola beto kusamba ti nge na mambu yina, bikala na nima ya ecodim.

==NSUKA YA LESO 16




Kana ntangu ikele--Kulonga mikanda ya

Bible : Bangindu keke na nsuka ya mukanda yai.

~~~~~

## Leso 16



Satana mekaka Yesu ngolo, kansi Yesu nungaka sambu Yandi vutulaka kaka Ndinga ya Nzambi. Satana tulaka Yesu na ludi ya Nzo-Nzambi, ebuna yandi songaka Yandi na kudilosa na ntoto. Yesu vutulaka nde Bible ke tuba, “Beno meka Mfumu Nzambi na nge ve”.



**Mono me  
bumba bansiku  
na Nge na  
ntima na mono,**

**sambu mono kusala**

**masumu ve na meso na Nge.**

***Bankunga 119 :11***

## BANGINDU KULONGA MIKANDA YA BIBLE

Kikuma ya nge sambu na baleso yai yonso : Nde bana bakisa Kuwakana ya Mpa kele nki, Mikanda ya Nsangu ya Mbote kele nki, Bo zaba mikanda 4 yina na ndonga, ti bo zaba kusosa baverse na kati ya Bible.


### **Kuwakana ya Ntama ti Kuwakana ya Mpa :**


Bible kele na bandambu zole—Kuwakana ya Ntama, ya bo sonikaka na ntwala ya Yesu, ti ya songa nde Mesia TA kwisa ; ti Kuwakana ya Mpa, ya bo sonikaka na nima ya Yesu, ya songa nde Mesia MENE kwisa. Baleso yai yonso me katuka na Kuwakana ya Mpa.

### **Nkunga : MIKANDA YA BIBLE**

Kuwakana ya ntama songaka na ntwala Nde Mesia fweti kwisa, kugulusa beto.

Kuwakana ya mpa songaka na nima Nde Mesia mene kwisa, kugulusa beto. Mesia kele Yesu, ti Bible ya mvimba Kele songa kaka Yandi, Mvulusi na beto !

 **Mikanda ya Kuwakana ya Mpa :** Kele Mikanda 4 ya Nsangu ya Mbote to Moyo ya Yesu, Mukanda 1 ya Histoire ya Dibundu, Mikanda ya Ntmwa Paulo, Mikanda ya Bantu ya Nkaka, ti mukanda ya profesi. Baleso yai me katuka na Mikanda 4 ya Nsangu ya Mbote to Moyo ya Yesu.

 **Mikanda Iya ya Nsangu ya Mbote :** Matayo, Marko, Luka, ti Yoane. Yai yonso vandaka balandi ya Yesu yina monaka ti waka Yandi bo mosi, ti waka mpi bitemwe ya bantu ya nkaka ya zabaka Yandi.


### **Nkunga : MIKANDA YA NSANGU YA MBOTE**


Mikanda ya mbote, ya Yesu, Mvulusi  
Mikanda ya mbote ikele iya :  
Matayo, ti Marko, ti Luka, ti Yoane.  
Mikanda ya mbote ya Yesu, Mfumu.


### **Nsaka, 'Na ntwala, na nima'**


Na nima bana zaba mbote mikanda ya nsangu ya mbote, mwana mosi tuba zina ya mukanda mosi. Yandi songa mwana ya nkaka ti tuba: 'Na ntwala,' to "Na nima.' Mwana yina fweti tuba


zina ya mukanda ya kwisa na ntwala to na nima ya mukanda yina.

 **Nombre ya Mukanda :** Matayo kele mukanda ya ntete, Marko ya zole, etc. Mwana mosi tuba nombre mosi 1 tii na 4. Yandi songa mwana ya nkaka. Mwana yina tuba zina ya mukanda yina. Par exemple, kana mwana tuba 4, mvutu ta vanda Yoane, mukanda ya iya na Kuwakana ya Mpa.

 **Kusosa baverse na Bible :** Kana Babible kele, tendula bana nde zina ya mukanda ti nombre ya kapu ta monika na zulu ya page. Nombre ya Kapu ta monika na nombre ya nene na kati ya kusonika. Banombre ya fioti songa verse to nzila ya kutanga. Bana sala pratike kusosa baverse ya nge tuba. Na nima bo me yikama, bo sala competisio kusosa baverse nswalu.

 **Kubalula batitre :** Na bacarte to bapapier, sonika bazina ya mikanda ya Bible. Balula yo na ordre kisakasaka. Pesa na bana sambu bo tula yo na ordre diaka.

 **Kusonika :** Sonika liste ya mikanda 4 ya Nsangu ya Mbote. Pesa bana papier ti crayon. Bo sala copi, kusonika mikanda yina. Kana papier kele ve, bo lenda sadila musapi bonso crayon, bo sonika na mupepe. Kana bo me zaba yo mbote, bo mosi tesa kusonika liste kukonda mbandu.

 **Chaine :** Mwana mosi tuba mukanda ya ntete, Matayo. Mwana na nima na yandi tuba verse ya zole, etc. Kana bo manisa mukanda ya iya, bo yantika diaka. Bo mpi lenda yimba yo bonso nkunga.

**BANKUNGA KELE NA MUKANDA YAI :**  
**(Ndonga Alfabetika)**

**2 KORINTO 5 :17**

\*=bula maboko

Kana muntu kele na kimvuka ti Kristo

(3X)

Ikele na kimvuka ti Kristo,

Yandi mene kuma muntu mosi Yaa-mpa !

(3X)

Me kuma muntu mosi ya mpa !

Mambu na yandi ya ntama \*\* me mana !

(3X)

Mambu ya Ntama mene mana !

Mambu ya mpa me kwisa kuyinga na yandi !

(3X)

Me kwisa kuyinga na yandi !

Tala na Korinto ya zole, kapu ta-a-nu

(3X)

Nzila kumi na-a nsambwadi !

Deuxième Korinte chapitre cinq tala verset-sept !

3X)

Deuxième Korinte, Cinq, dix-sept !

**EMMANUELE**

Emmanuele ! Emmanuele !

Zina na yandi--Emmanuele !

Nzambi kibeni, Awa na beto

Zina na Yandi

Emmanuele

**KANA NGE ZABA NGE ME VULUSWA**

**NB:** Na bisika ya nkaka, bo tuba 'guluka' na sika ya 'vuluswa.'

Kana nge zaba nge me vuluswa,

Baka mbotika ! XX

Kana nge zaba nge me vuluswa, baka mbotika ! XX

**Mvutu :**

Kana nge me vuluswa,

Luzingu ta songa

Kana nge zaba nge me vuluswa,  
Baka mbotika ! XX

**KUMISA ZINA YA YESU**

Kumisa Zina ya Yesu (2x)

Ditadi na mono

Ngolo na mono

Mvulusi na mono

Ye lukwikilu !

Zitisa zina ya Ye-e-e-su !

**KUWA BIBLE**

(Ton : Frere Jacques)

Kuwa Bible

Tanga Bible

'Buna Nge

Ta mona

Nzila mbote mingi

Nzila mbote mingi

Ye ngangu

Ye ngangu

**KWENDA NORD, KWENDA SUD**

Kwenda nord

Kwenda sud

Kwenda na gauche et droite

Beto kwenda

Beto kwenda

Na nsangu ya mbote

Na bandombe

Na mindele

Na makanda yonso

Beto kwenda

Beto kwenda

Na nsangu ya Yesu.

**MAZONO, BUBU, MVU YA MVU**

Mazono, bubu mvu ya mvu,

Yesu mutindu mosi !

Bantu yonso kulenda changer,

kansi Yesu ve.

Nkembo kwa yandi ! Nkembo kwa Yandi !

Bantu yonso kulenda changer,

kansi Yesu ve.



**MBOTE BO YONSO ZABA**

Mbote bo yonso zaba (3X)  
Yesu kele!

Yesu bikisaka zulu  
Kulumukaka mpenza  
Butamaka bonso beto  
Mbote bo yonso zaba !

**MBOTIKA TA VULUSA NGE VE !**

Mbotika ta vulusa nge ve !  
Yina kele kaka kidimbu  
Mbotika ta vulusa nge ve  
Tula ntima na Mfumu Yesu !

Mbotika ta vulusa nge ve  
Yina kele kaka kidimbu  
Nge me kuma mukristo ntangu  
Ntangu ntete nge ndima Yesu !

Mbotika ta vulusa nge ve !  
Yina kele kaka kidimbu  
Na kusonga na meso bantu  
Nge me kuma muntu ya mpa !

**MFUMU YA BAMFUMU YONSO**

Mfumu ya bamfumu yonso,  
Nkembo ! Aleluya !  
Mfumu ya bamfumu yonso,  
Nkembo ! Aleluya !

**MO' KWIKILA BIBLE**

Mo' kwikila Bible  
Mo' kwikila Bible  
Mo' kwikila Bible  
ke ndinga-Nzambi !

Yesu fwilaka nge  
Yesu fwilaka nge  
Yesu fwilaka nge  
Fwilaka mono

**MFUMU ZABA NZILA NA MONO**

Mfumu zaba nzila na mono  
Mono fweti landa kaka  
Mfumu zaba nz'ila na mono  
Mono fweti landa kaka

Ngolo bubu Yandi ta pesa  
Ye yonso ya mfunu mbasi  
Mfumu zaba nzila na mono  
Mono fweti landa kaka !

**MONO KELE NA NZO KITOKO**

Mono kele na nzo kitoko  
Kuna n'zulu !  
Mono kele na nzo kitoko  
Kuna n'zulu !  
Mono kele na nzo kitoko  
Kuna n'zulu !  
Kuna na zulu ! (O Nzambi !)

***Mvutu:***

Mfumu, O Mfumu, mono ta tonda Nge  
(O Nzambi)  
Mfumu, O Mfumu, mono ta tonda Nge  
(O Nzambi)  
Mfumu, O Mfumu, mono ta tonda Nge  
Kuna na zulu !

Baka mbotika, nge mukristo,  
Na kati ya masa.  
Baka mbotika, nge mukristo,  
Na kati ya masa.  
Baka mbotika, nge mukristo,  
Na kati ya masa.  
Kusonga lukwikilu na nge ! (O Nzambi)

**MONO ZOLA YESU NGULUSI**

Mono zola Yesu Ngulusi,  
Yandi zola mono, mpi.

Yesu fwaka na kulunsi,  
Yandi fwilaka mono.

Mono zola Yesu Ngulusi,  
Yandi zola mono, mpi.

**MOSI NA TATU**

Nzambi Tata, Mwana-Nzambi  
Nzambi Mpeve, Tatu na Mosi  
Nzambi Tata, Mwana-Nzambi  
Nzambi Mpeve, Tatu na Mosi

**MWANA NZAMBI MENE KUMA AWA**

Ee-ee-ee ! Kiese Aya !  
Mwana-Nzambi mene kum' awa.  
Kiese Aya !

Ee-ee-ee ! Kiese Aya !  
Mwana-Nzambi mene telama !  
Kiese Aya ! (Repeter mbala mingi)

**MWANA YINA NANI ?**

Mwana yina nani?  
Yesu !  
Mwana yina nani ?  
Yesu !  
Yandi Mesia  
Mwana ya Nzambi  
Nani ? Yesu !

**MWINI NA MONO**

Mo' tambulaka na mpimpa tii Yesu Kwisaka  
Yandi na zola na Yandi katulaka mpimpa !

**Mvutu** : Yesu, Yesu, Mwini na Mono  
Yesu, Yesu, Bilumbu Yonso  
Yesu me vulusa mono na nlemvo  
Yandi mene kuma mwini na mono !

**NA MBETO YA NSUKAMI**

Na mbeto ya nsukami  
Ya kitoko ve,  
Mwana ya Nzambi  
lalaka kuna.  
Na nzo ya bambisi,  
Matela ya nianga,  
Mwana Yesu Kristo  
Kudikulukumaka !

Nani yindulaka nde  
Nzambi-Mpungu  
Ta bika nzo na Yandi na zulu ?  
Kukota nsi yai ya masumu  
Kugulusa beto  
Bankwa ya mbi ?

**O BWALA YA FIOTI BETLEHEMI**

O, bwala ya fioti Betlehemu,  
Kuvanda na kiese  
Mfumumu ya nene, Mesia  
Ta basika na nge kaka.

Nzila Yandi ta kwisa  
Ta vanda ya pima  
Kansi bantu ya kieleka  
Ta yamba Yandi kaka.

**O BIBLE KELE KIELEKA**

O, Bible kele kieleka, kieleka, kieleka,  
O, Bible kele kieleka  
Yo ke luvunu ve !

O, Bible kele kitoko, kitoko, kitoko,  
O Bible kele kitoko  
Mo' zola yo mingi !

**YA' KE NA NTOTO YONSO NA MAKOBO**

Ya' ke na ntoto yonso  
Na maboko (3x)  
Na maboko na Yandi !

Ya' ke na nge ti mono  
Na maboko (3x)  
Na maboko na Yandi !

Ya' ke na bantu yonso  
Na maboko (3x)  
Na maboko na Yandi !

**YANGALALA, BANTU YONSO !**

Yangalala, bantu yonso !  
Beto yamba Mfumumu !  
Ntima ya konso muntu  
Kuyamba Yesu na kiese

Bantu kuyangalala !  
Bantu kuyangalala !  
Ntoto ti zulu  
Kuyangalala !



Nzambi

Pima



Mukanda ya Malashi  
Nsuka ya Kuwakana ya Ntama  
400  
Av. J.-C.

0



1  
Ap. J.-C.

12  
Ap. J.-C.

30  
Ap. J.-C.

# Bamvula na nima ya Yesu